

思益梵天所問經卷第一

傷七

姚秦三藏法師鳩摩羅什譯

如來光明品第一

如是我聞一時佛在王舍城迦蘭陀竹林與
大比丘僧六萬四千人俱菩薩摩訶薩七萬
二千^{傷七}人皆衆所知識得陀羅尼無礙辯才及
諸三昧於諸神通無所罣礙善能曉了諸法
實性悉皆逮得無生法忍其名曰文殊師利
法王子寶手法王子寶積法王子寶印手法
王子寶德法王子虛空藏法王子發心轉法

輪法王子網明法王子障諸煩惱法王子能
捨一切法王子德藏法王子華嚴法王子師
子法王子月光法王子尊意法王子善莊嚴
法王子及跋陀羅婆等十六賢士跋陀婆羅
菩薩寶積菩薩星德菩薩帝天菩薩水天菩
薩善力菩薩大意菩薩殊勝意菩薩增意菩
薩善發意菩薩不虛見菩薩不休息菩薩不
少意菩薩導師菩薩日藏菩薩持地菩薩如
是等菩薩摩訶薩七萬二千人及四天王釋
提桓因等忉利諸天夜摩天兜率陀天化樂

天他化自在天及梵王等諸梵天并餘無量
諸天龍鬼神夜叉乾闥婆阿修羅迦樓羅緊
那羅摩睺羅伽人與非人普皆來集爾時世
尊大眾恭敬圍繞而爲說法於是網明菩薩
即從座起偏袒右肩右膝著地頭面禮佛足
合掌向佛動此三千大千世界引導起發一
切大眾而白佛言世尊我欲從佛少有所問
若佛聽者乃敢諮請佛告網明恣汝所問當
爲解說悅可爾心於是網明既蒙聽許心大
歡喜即白佛言世尊如來身相超百千萬日

月光明我自惟念若有衆生能見佛身甚爲
希有我復惟念若有衆生能見佛身皆是如
來威神之力佛告網明如是如是如汝所言
若佛不加威神衆生無有能見佛身亦無能
問網明當知如來有光名寂莊嚴若有衆生
遇斯光者能見佛身佛七不壞眼根又如來光名
無畏辯若有衆生遇斯光者能問如來其辯
無盡又如來光名集諸善根若有衆生遇斯
光者能問如來轉輪聖王行業因緣又如來
光名淨莊嚴若有衆生遇斯光者能問如來

天帝釋行業因緣又如來光名得自在若有衆生遇斯光者能問如來梵天王行業因緣又如來光名離煩惱若有衆生遇斯光者能問如來聲聞乘所行之道又如來光名善遠離若有衆生遇斯光者能問如來辟支佛所行之道又如來光名益一切智若有衆生遇斯光者能問如來大乘佛事又如來光名曰往益佛來去時足下光明衆生遇者命終生天又如來光名一切莊嚴若佛入城放斯光明衆生遇者得歡喜樂一切莊飾之具莊嚴

其城城中寶藏從地涌出又如來光名曰震動佛以此光能動無量無邊世界又如來光名曰生樂佛以此光能滅地獄衆生苦惱又如來光名曰上慈佛以此光能令畜生不相惱害又如來光名曰涼樂佛以此光能滅飢鬼饑渴熱惱又如來光名曰明淨佛以此光使盲者得視又如來光名曰聰聽佛以此光能令衆生聾者得聽又如來光名曰慚愧佛以此光能令衆生狂者得正又如來光名曰止息佛以此光能令衆生捨十不善道安住

十善道又如來光名曰離惡佛以此光能令
邪見衆生皆得正見又如來光名曰能捨佛
以此光能破衆生慳貪之心令行布施又如
來光名無惱熱佛以此光能令毀禁衆生皆
得持戒又如來光名曰安利佛以此光能令
瞋恨衆生皆行忍辱又如來光名曰勤修佛
以此光能令懈怠衆生皆行精進又如來光
名曰一心佛以此光能令妄念衆生皆得禪
定又如來光名曰能解佛以此光能令愚癡
衆生皆得智慧又如來光名曰清淨佛以此

光能令不信衆生皆得淨信又如來光名曰
能持佛以此光能令少聞衆生皆得多聞又
如來光名曰威儀佛以此光能令無慚衆生
皆得慚愧又如來光名曰安隱佛以此光能
令多欲衆生斷除婬欲又如來光名曰歡喜
佛以此光能令多怒衆生斷除瞋恚又如來
光名曰照明佛以此光能令多癡衆生斷除
愚癡又如來光名曰徧行佛以此光能令等
分衆生斷除等分又如來光名示一切色佛
以此光能令衆生皆見佛身無量種色網明

當知如來若以一劫若減一劫說此光明力
用名號不可窮盡爾時網明菩薩白佛言未
曾有也世尊如來身者即是無量光明之藏
說法方便亦不可思議世尊我自昔來未曾
聞此光明名號如我解佛所說義若有菩薩
聞斯光明名號信心清淨皆得如是光明之
身世尊唯願今日放請菩薩光令他方菩薩
善能問難者見斯光已發心來此娑婆世界
爾時世尊受網明菩薩請已即放光明照此
三千大千世界普及十方無量佛土於是諸

方無量百千萬億菩薩見斯光已皆來至此
娑婆世界時東方過七十二恒河沙佛土有
國名清潔佛號日月光如來應正徧知今現
在其佛土有菩薩梵天名曰思益住不退轉
見此光已到日月光佛所頭面作禮白佛言
世尊我欲詣娑婆世界釋迦牟尼佛所奉觀
供養親近諮受彼佛亦復欲見我等其佛告
言便往梵天今正是時彼娑婆國有若干千
億諸菩薩集汝應以十法遊於彼土何等爲
十於毀於譽心無增減聞善聞惡心無分別

於諸愚智等以悲心於上中下衆生之類意
常平等於輕毀供養心無有二於他闕失莫
見其過見種種乘皆是一乘聞三惡道亦勿
驚畏於諸菩薩生如來想佛出五濁世生希
有想梵天汝當以此十法遊彼世界思益梵
天修七白佛言世尊我不敢於如來前作師子吼
我所能行佛自知之今當以此十法遊彼世
界一心修行爾時日月光佛國有諸菩薩白
佛言世尊我得大利不生如是惡衆生中其
佛告言善男子勿作是語所以者何若菩薩

於此國中百千萬劫淨修梵行不如彼土從
旦至食無瞋礙心其福爲勝時有萬二千菩
薩與思益梵天俱共發來而作是言我等亦
欲以此十法遊彼世界見釋迦牟尼佛於是
思益梵天與萬二千菩薩俱於彼佛土忽然
不現譬如壯士屈伸臂頃到娑婆世界釋迦
牟尼佛所却住一面爾時佛告網明菩薩汝
見是思益梵天不唯然已見網明當知思益
梵天於諸正問菩薩中爲最第一於諸善分
別諸法菩薩中爲最第一於諸說隨宜經意

菩薩中爲最第一於諸慈心菩薩中爲最第一於諸悲心菩薩中爲最第一於諸喜心菩薩中爲最第一於諸捨心菩薩中爲最第一於諸不瞋癡菩薩中爲最第一於諸先意問訊菩薩中爲最第一於諸決疑菩薩中爲最第一爾時思益梵天與萬二千菩薩俱頭面禮佛足右繞三匝合掌向佛以偈讚曰

世尊大名稱 普聞於十方 所在諸如來 無不稱歎者 有諸餘淨國 無三惡道名

捨如是妙土 慈悲放生此 佛智無減少
 與諸如來等 以大悲本願 處斯穢惡土
 若人於淨國 持戒滿一劫 此土須臾間
 行慈爲最勝 若人於此土 起身口意罪
 應墮三惡道 現世受得除 生此土菩薩
 不應懷憂怖 設有惡道罪 頭痛即得除
 此土諸菩薩 若能守護法 世世所生處
 不失於正念 若人欲斷縛 滅煩惱業罪
 於此土護法 增益一切智 淨土多億劫
 受持法解說 於此娑婆界 從旦至食勝

傷七

六

我見喜樂國	及見安樂土	此中無苦惱
亦無苦惱名	於彼作功德	未足以爲奇
於此煩惱處	能忍不可事	亦教他此法
其福爲最勝	我禮無上尊	大悲救苦者
能爲惡衆生	說法甚爲難	佛集無量衆
十方世界中	名聞諸菩薩	聽法無厭足
佛集十方界	名聞諸菩薩	聽法無厭足
如海吞衆流	爲如是人等	廣說於佛道
釋梵四天王	諸天龍神等	皆集欲求法
隨所信樂說	比丘比丘尼	及清信士女

是四衆普集	願時爲演說	有樂佛乘者
及緣覺聲聞	佛知其深心	悉皆爲斷疑
不斷佛種者	能出生三寶	爲是諸菩薩
我今請法王	名稱普流布	十方菩薩聞
皆悉共來集	爲說無上道	此無上大法
二乘所不及	我等信力故	得入如是法
不可思議慧	非我等所及	佛雖無疲倦
我今有所請	悔過於世尊	願說菩薩道
四法品第二		
爾時思益梵天說此偈已白佛言世尊何謂		

菩薩其心堅固而無疲倦何謂菩薩所言決定而不中悔何謂菩薩增長善根何謂菩薩無所恐懼威儀不轉何謂菩薩成就白法何謂菩薩善知從一地至一地何謂菩薩於眾生中善知方便何謂菩薩善化眾生何謂菩薩世世不失菩提之心何謂菩薩能一其心而無雜行何謂菩薩善求法寶何謂菩薩善出毀禁之罪何謂菩薩善障煩惱何謂菩薩善入諸大衆何謂菩薩善開法施何謂菩薩得先因力不失善根何謂菩薩不由他教而

能自行六波羅蜜何謂菩薩能轉捨禪定還生欲界何謂菩薩於諸佛法得不退轉何謂菩薩不斷佛種爾時世尊讚思益梵天善哉善哉能問如來如此之事汝今諦聽善思念之唯然世尊願樂欲聞佛告思益梵天菩薩有四法堅固其心而不疲倦何等爲四一者於諸衆生起大悲心二者精進不懈三者信解生死如夢四者正思惟佛之智慧菩薩有此四法堅固其心而不疲倦梵天菩薩有四法所言決定而不中悔何等爲四一者決定

說諸法無我二者決定說諸生處無可樂者
三者決定常讚大乘四者決定說罪福業不
失是爲四梵天菩薩有四法增長善根何等
爲四一者持戒二者多聞三者布施四者出
家是爲四梵天菩薩有四法無所恐懼威儀
不轉何等爲四一者失利二者惡名三者毀
辱四者苦惱是爲四梵天菩薩有四法成就
白法何等爲四一者教人令信罪福二者布
施不求果報三者守護正法四者以智慧教
諸菩薩是爲四梵天菩薩有四法善知從一

地至一地何等爲四一者久植善根二者離
諸過咎三者善知方便迴向四者勤行精進
是爲四梵天菩薩有四法於衆生中善知方
便何等爲四一者順衆生意二者於他功德
起隨喜心三者悔過除罪四者勸請諸佛是
爲四梵天菩薩有四法善化衆生何等爲四
一者常求利益衆生二者自捨己樂三者心
和忍辱四者除捨憍慢是爲四梵天菩薩有
四法世世不失菩提之心何等爲四一者常
憶念佛二者所作功德常爲菩提三者親近

善知識四者稱揚大乘是爲四梵天菩薩有
四法能一其心而無雜行何等爲四一者離
聲聞心二者離辟支佛心三者求法無厭四
者如所聞法廣爲人說是爲四梵天菩薩有
四法善求法寶何等爲四一者於法中生寶
想以難得故二者於法中生樂想療衆病故
三者於法中生財利想以不失故四者於法
中生滅苦想至涅槃故是爲四梵天菩薩有
四法善出毀禁之罪何等爲四一者得無生
法忍以諸法無來故二者得無滅法忍以諸

法無去故三者得因緣忍知諸法因緣生故
四者得無住忍無異心相續故是爲四梵天
菩薩有四法善障煩惱何等爲四一者正憶
念二者障諸根三者得善法力四者獨處遠
離是爲四梵天菩薩有四法善入諸大衆何
等爲四一者求法不求勝二者恭敬心無憍
慢三者唯求法利不自顯現四者教人善法
不求名利是爲四梵天菩薩有四法善開法
施何等爲四一者守護於法二者自益智慧
亦益他人三者行善入法四者示人垢淨是

爲四梵天菩薩有四法得先因力不失善根何等爲四一者見他人闕不以爲過二者於瞋怒人常修慈心三者常說諸法因緣四者常念菩提是爲四梵天菩薩有四法不由他教而能自行六波羅蜜何等爲四一者以施導人二者不說他人毀禁之罪三者善知攝法教化衆生四者解達深法是爲四梵天菩薩有四法能轉捨禪定還生欲界何等爲四一者其心柔軟二者得諸善根力三者不捨一切衆生四者善修智慧方便之力是爲四

梵天菩薩有四法於諸佛法得不退轉何等爲四一者受無量生死二者供養無量諸佛三者修行無量慈心四者信解無量佛慧是爲四梵天菩薩有四法不斷佛種何等爲四一者不退本願二者言必施行三者大欲精進四者深心行於佛道是爲菩薩有此四法不斷佛種說是諸四法時二萬二千天子及人皆發阿耨多羅三藐三菩提心五千人得無生法忍十方諸來菩薩供養於佛所散天華周徧三千大千世界積至于膝

傷七

十

菩薩正問品第三

爾時網明菩薩問思益梵天言佛說汝於正問菩薩中為最第一何謂菩薩所問為正問耶梵天言網明若菩薩以彼我問名為邪問分別法問名為邪問若無彼我問名為正問不分別法問名為正問又網明以生故問名為邪問以滅故問名為邪問以住故問名為邪問若不以生故問不以滅故問不以住故問名為正問又網明若菩薩為垢故問名為邪問為淨故問名為邪問為生死故問名為

邪問為出生死故問名為邪問為涅槃故問名為邪問若不為垢淨故問不為生死出生死故問不為涅槃故問名為正問所以者何法位中無垢無淨無生死無涅槃又網明若菩薩為見故問為斷故問為證故問為修故問為得故問為果故問名為邪問若無見無斷無證無修無得無果故問名為正問又網明是善是不善故問名為邪問是世間法是出世間法是罪法は無罪法是有漏法是无漏法是有為法是无為法如是等二法隨有

佛七

十一

所依而問者名爲邪問若不見二不見不二問名爲正問又網明若菩薩分別佛問名爲邪問分別法分別僧分別衆生分別佛國分別諸乘問名爲邪問若於法不作一異問者名爲正問又網明一切法正一切法邪網明言梵天何謂一切法正一切法邪梵天言於諸法性無心故一切法名爲正若於無心法中以心分別觀者一切法名爲邪一切法離相名爲正若不信解是離相是即分別諸法若分別諸法則入增上慢隨所分別皆名爲

邪網明言何謂爲諸法正性梵天言諸法離自性離欲際是名正性網明言少有能解如是正性者梵天言是正性不一不多網明若善男子善女人能如是知諸法正性若已知若今知若當知是人無有法已得無有法今得無有法當得所以者何佛說無得無分別名爲所作已辦相若人聞是諸法正性勤行精進是名如說修行不從一地至一地若不從一地至一地是人不在生死不在涅槃所以者何諸佛不得生死不得涅槃網明言佛

不爲度生死故說法耶梵天言佛所示法有
度生死耶網明言無也梵天言以是因緣當
知佛不令衆生出生死入涅槃但爲度妄想
分別生死涅槃二相者耳此中實無度生死
至涅槃者所以者何諸法平等無有往來無
出生死無入涅槃爾時世尊讚思益梵天言
善哉善哉說諸法正性應如汝所說說是法
時二千比丘不受諸法漏盡心得解脫佛告
梵天我不得生死不得涅槃如來雖說生死
實無有人往來生死雖說涅槃實無有人得

傷七

十二

滅度者若有入此法門是人非生死相非滅
度相爾時會中五百比丘從座而起作是言
我等空修梵行今實見有滅度者而言無有
滅度我等何用修道求智慧爲爾時網明菩
薩白佛言世尊若有於法生見則於其人佛
不出世世尊若有決定見涅槃者是人度
生死所以者何涅槃名爲除滅諸相遠離一
切動念戲論世尊是諸比丘於佛正法出家
而今隨於外道邪見見涅槃決定相譬如從
麻出油從酪出酥世尊若人於諸法滅相中

求涅槃者我說是輩皆爲增上慢人世尊正
行道者於法不作生不作滅無得無果網明
謂梵天言是五百比丘從座起者汝當爲作
方便引導其心入此法門令得信解離諸邪
見梵天言善男子縱使令去至恒河沙劫不
能得出如此法門譬如癡人畏於虛空捨空
而走在此所至處不離虛空此諸比丘亦復如
是雖復遠去不出空相不出無相相不出無
作相又如一人求索虛空東西馳走言我欲
得空我欲得空是人但說虛空名字而不得

傷七

十三

空於空中行而不見空此諸比丘亦復如是
欲求涅槃行涅槃中而不得涅槃所以者何
涅槃者但有名字猶如虛空但有名字不可
得取涅槃亦復如是但有名字而不可得爾
時五百比丘聞說是法不受諸法漏盡心得
解脫得阿羅漢道作是言世尊若人於諸法
畢竟滅相中求涅槃者則於其人佛不出世
世尊我等今者非凡夫非學非無學不在生
死不在涅槃所以者何佛出世故名爲遠離
一切動念戲論

爾時長老舍利弗謂諸比丘汝今得正智爲
已利耶五百比丘言長老舍利弗我等今者
得諸煩惱不可作而作舍利弗言何故說此
諸比丘言知諸煩惱實相故言得諸煩惱涅
槃是無作性我等已證故說不可作而作舍
利弗言善哉善哉汝等今者住於福田能消
供養諸比丘言大師世尊尚不能消諸供養
何況我等舍利弗言何故說此諸比丘言世
尊知見法性常淨故於是思益梵天白佛
言世尊誰應受供養佛告梵天不爲世法之

所牽者世尊誰能消供養佛言於法無所取
者世尊誰爲世間福田佛言不壞善提性者
世尊誰爲衆生善知識佛言於一切衆生不
捨慈心者世尊誰知報佛恩佛言不斷佛種
者世尊誰能供養佛佛言能通達無生際者
世尊誰能親近於佛佛言乃至失命因緣不
毀禁者世尊誰能恭敬於佛佛言善覆六根
者世尊誰名財富佛言成就七財者世尊誰
名知足佛言得出世間智慧者世尊誰爲遠
離佛言於三界中無所願者世尊誰爲具足

傷七

十四

佛言能斷一切諸結使者世尊誰爲樂人佛言無貪著者世尊誰無貪著佛言知見五陰者世尊誰度欲河佛言能捨六入者世尊誰住彼岸佛言能知諸道平等者世尊何謂菩薩能爲施主佛言菩薩能教衆生一切智心世尊何謂菩薩能奉禁戒佛言常能不捨菩提之心世尊何謂菩薩能行忍辱佛言見心相念念滅世尊何謂菩薩能行精進佛言求心不得世尊何謂菩薩能行禪定佛言除身心羸相世尊何謂菩薩能行智慧佛言於一

切法無有戲論世尊何謂菩薩能行慈心佛言不生衆生想世尊何謂菩薩能行悲心佛言不生法想世尊何謂菩薩能行喜心佛言不生我想世尊何謂菩薩能行捨心佛言不生彼我想世尊何謂菩薩安住於信佛言信解心淨無濁法世尊何謂菩薩安住於空佛言不著一切語言世尊何謂菩薩名爲有慚佛言知見內法世尊何謂菩薩名爲有愧佛言捨於外法世尊何謂名爲菩薩徧行佛言能淨身口意業爾時世尊而說偈言

第七

十五

若身淨無惡	口淨常實語	心淨常行慈
是菩薩徧行	行慈無貪著	觀不淨無恚
行捨而不癡	是菩薩徧行	若在空聚野
及與處大衆	威儀終不轉	是菩薩徧行
知法名爲佛	知離名爲法	知無名爲僧
是菩薩徧行	知多欲所行	知恚癡所行
善知轉此行	是菩薩徧行	不依止欲界
不住色無色	行如是禪定	是菩薩徧行
信解諸法空	及無相無作	而不盡諸漏
是菩薩徧行	善知聲聞乘	及辟支佛乘

通達於佛乘 是菩薩徧行 明解於諸法
不疑道非道 憎愛心無異 是菩薩徧行
於過去未來 及與現在世 一切無分別
是菩薩徧行

爾時思益梵天白佛言世尊何謂菩薩過世
間法通達世間法通達世間法已度衆生於
世間法行於世間不壞世間爾時世尊以偈
答言

說五陰是世 世間所依止 依止於五陰
不脫世間法 菩薩有智慧 知世間實相

所謂五陰如 世間法不染
稱譏與苦樂 如此之八法
大智慧菩薩 散滅世間法
處之而不動 得利心不高
其心堅不動 譬如須彌山
稱譏與苦樂 ^{度七}於此世八法
知世間虛妄 皆從顛倒起
不行世間道 世間所有道
故能於世間 度衆生苦惱
如蓮華不染 亦不壞世間

利衰及毀譽
常牽於世間
見世壞敗相
失利心不下
利衰及毀譽
^{十六}其心常平等
如是之人等
菩薩皆識知
雖行於世間
通達法性故

世間行世間
明了世間相
菩薩知如是
隨知而演說
五陰無自性
常住於世間
是人行世間
於世起諍訟
我常不與世
悉以了知故

不知是世間
世間虛空相
不染於世間
知世間性故
是即世間性
若見知五陰
而不依世間
是實是不實
起於諍訟事
諸佛所說法

菩薩行世間
虛空亦無相
如所知世間
亦不壞世間
若人不知是
無生亦無滅
凡夫不知法
住是二相中
世間之實相
皆悉無諍訟

知世平等故	非實非虛妄	若佛法決定
有實有虛妄	是即為貪著	與外道無異
而今實義中	無實無虛妄	是故我常說
出世法無二	若人知世間	如是之實性
於實於虛妄	不取此惡見	如是知世間
清淨如虛空	是大名稱人	照世間如日
若人見世間	如我之所見	如斯之人等
能見十方佛	諸法從緣生	自無有定性
若知此因緣	則達法實相	若知法實相
是則知空相	若能知空相	則為見導師

第七

十七

若有人得聞	如是世間相	雖行於世間
而不住世間	依止諸見人	不能及此事
云何行世間	而不住世間	若佛滅度後
有樂是法者	佛則於其人	常現於法身
若人解達此	則守護我法	亦為供養我
亦是世導師	若人須臾聞	世間性如此
是人終不為	惡魔所得便	若能達此義
則為大智慧	法財之施主	亦是具禁戒
若知世如此	忍辱力勇健	具足諸禪定
通達於智慧	所在聞是法	其方則有佛

如是諸菩薩 不久坐道場 若有深愛樂
如是世間性 則能降衆魔 疾得無上道
四諦品第四

佛復告思益梵天如來出過世間亦說世間
苦世間集世間滅世間滅道五陰名爲世間
貪著五陰名爲世間集五陰盡名爲世間滅
以無二法求五陰名爲世間滅道又梵天所
言五陰但有言說於中取相分別生見而說
是名世間不捨是見是名世間集是見自相
是名世間滅隨以何道不取是見是名世間

滅道梵天以是因緣故我爲外道仙人說言
仙人於汝身中即說世間苦世間集世間滅
世間滅道爾時思益梵天白佛言世尊所說
四聖諦何等是真聖諦梵天苦不名爲聖諦
苦集不名爲聖諦苦滅不名爲聖諦苦滅道
不名爲聖諦所以者何若苦是聖諦者一切
牛驢畜生等皆應有苦聖諦若集是聖諦者
一切在所生處衆生皆應有集聖諦所以者
何以集故生諸趣中若苦滅是聖諦者觀滅
者說斷滅者皆應有滅聖諦若道是聖諦者

傷七

十八

緣一切有為道者皆應有道聖諦梵天以是因緣故當知聖諦非苦非集非滅非道聖諦者知苦無生是名苦聖諦知集無和合是名集聖諦於畢竟滅法中知無生無滅是名滅聖諦於一切法平等以不二法得道是名道聖諦梵天真聖諦者無有虛妄虛妄者所謂著我著衆生著人著壽命者著養育者著有著無著生著滅著生死著涅槃梵天若行者言我知見苦是虛妄我斷集是虛妄我滅證是虛妄我修道是虛妄所以者何是人遺失

佛所護念是故說為虛妄何等是佛所護念謂不憶念一切諸法是名佛所護念若行者住是念中則不住一切相若不住一切相則住實際若住實際是名不住心若不住心是人名為非實語非妄語者梵天是故當知若非實非虛妄者是名聖諦梵天實者終不作不實若有佛若無佛法性常住所謂生死性涅槃性是性常實所以者何非離生死得涅槃名為聖諦若人證如是四諦是名世間實語者梵天當來有比丘不修身不修戒不修

佛七

十九

心不修慧是人說生相是苦諦衆緣和合是集諦滅法是滅諦以二法求相是道諦佛言我說此愚人是外道徒黨我非彼人師彼非我弟子是人墮於邪道破失法故說言有諦梵天且觀我坐道場時不得一法是實是虛妄若我不得法是法寧可於衆中有言說有論議有教化耶梵天言不也世尊梵天以諸法無所得故諸法離自性故我菩提是無貪愛相

歎功德品第五

爾時思益梵天白佛言世尊若如來於法無所得者有何利益說如來得菩提名為佛佛言梵天於汝意云何我所說法若有為若無為是法為實為虛妄耶梵天言是法虛妄非實於汝意云何若法虛妄非實是法為有為無梵天言世尊若法虛妄是法不應說有不應說無於汝意云何若法非有非無是法有得者不梵天言無有得者梵天如來坐道場時唯得虛妄顛倒所起煩惱畢竟空性以無所得故得以無所知故知所以者何我所得

法不可見不可聞不可覺不可識不可取不可著不可說不可難出過一切法相無語無說無有文字無言說道梵天此法如是猶如虛空汝欲於如是法中得利益耶梵天言不也世尊諸佛如來甚爲希有成就未曾有法

佛十

二十一

深入大慈大悲得如是寂滅相法而以文字言說教人令得世尊其有聞是能信解者當知是人從小功德來世尊是法一切世間之所難信所以者何世間貪著實而是法無實無虛妄世間貪著法而是法無法無非法

世間貪著涅槃而是法無生死無涅槃世間貪著善法而是法無善無非善世間貪著樂而是法無苦無樂世間貪著佛出世而是法無佛出世亦無涅槃雖有說法而是法非可說相雖讚說僧而僧即是無爲是故此法一切世間之所難信譬如水中出火火中出水難可得信如是煩惱中有菩提菩提中有煩惱是亦難信所以者何如來得是虛妄煩惱之性亦無法不得有所說法亦無有形雖有所知亦無分別證涅槃亦無滅者世尊若有

永樂北藏

思益梵天所問經

第四二冊

善男子善女人能信解如是法義者當知是人得脫諸見當知是人已親近無量諸佛當知是人已供養無量諸佛當知是人爲善知識所護當知是人志意曠大當知是人善根深厚當知是人守護諸佛法藏當知是人能善思量起於善業當知是人種姓尊貴生如來家當知是人能行大捨捨諸煩惱當知是人得持戒力非煩惱力當知是人得忍辱力非瞋恚力當知是人得精進力無有疲懈當知是人得禪定力滅諸惡心當知是人得智

傷七

廿一

慧力離惡邪見當知是人一切惡魔不能得便當知是人一切怨賊所不能破當知是人不誑世間當知是人真語者善說法相故當知是人是實語者說第一義故當知是人善爲諸佛之所護念當知是人柔和輒善同止安樂當知是人名爲大富有聖財故當知是人常能知足行聖種故當知是人易滿易養離貪著故當知是人得安隱心到彼岸故當知是人度未度者當知是人解未解者當知是人安未安者當知是人滅未滅者當知

是人能示正道當知是人能說解脫當知是
人爲大醫王善知諸藥當知是人猶如良藥
善療衆病當知是人智慧勇健當知是人爲
有大力堅固究竟當知是人精進力不隨
他語當知是人爲如師子無所怖畏當知是
人爲如象王其心調柔當知是人爲如老象
其心隨順當知是人爲如牛王能導大衆當
知是人爲大勇健能破魔怨當知是人爲大
丈夫處衆無畏當知是人無所忌難得無畏
法故當知是人無所畏難說真諦法故當知

是人具清白法如月盛滿當知是人智慧光
照猶如日月當知是人除諸闇冥猶如執炬
當知是人樂行捨心離諸憎愛當知是人載
育衆生猶如地當知是人洗諸塵垢猶如水
當知是人燒諸動念猶如火當知是人於法
無障猶如風當知是人其心不動如須彌當
知是人其心堅固如金剛山當知是人一切
外道競勝論者所不能動當知是人一切聲
聞辟支佛所不能測當知是人多饒法寶猶
如大海當知是人煩惱不現如波陀羅當知

修七

廿二

是人求法無厭當知是人以智慧知是當知
是人能轉法輪如轉輪王當知是人身色殊
妙如天帝釋當知是人心得自在如梵天王
當知是人說法音聲猶如雷震當知是人降
法甘露猶如時雨當知是人能增長無漏根
力覺分當知是人能轉法輪如轉輪王當知
是人已度生死汙泥當知是人入佛智慧當
知是人近佛菩提當知是人能多學問無與
等者當知是人無有量已過量當知是人智
慧辯才無有障礙當知是人憶念堅固得陀

羅尼當知是人知諸衆生深心所行當知是
人得智慧力正觀諸法解達義趣當知是人
勤行精進利安世間當知是人超出於世當
知是人不可汙染猶如蓮華當知是不爲
世法所覆當知是人利根者所愛當知是人
多聞者所敬當知是人智者所念當知是人
天人供養當知是人爲坐禪者所禮當知是
人善人所貴當知是人聲聞辟支佛之所舍
慕當知是不貪小行當知是不不覆藏罪
不顯功德當知是人威儀備具生他淨心當

傷七

廿三

知是人身色端正見者悅樂當知是人有大
威德衆所宗仰當知是人以三十二相莊嚴
其身當知是人能繼佛種當知是人能護法
寶當知是人能供養僧當知是人諸佛所見
當知是人爲得法眼當知是人以佛智慧而
得受記當知是人具足三忍當知是人安住
道場當知是人破壞魔軍當知是人得一切
種智當知是人轉於法輪當知是人作無量
佛事若人信解如是法義不驚疑怖畏者得
如是功德是人於諸佛阿耨多羅三藐三菩

提甚深難解難知難信難入而能信受讀誦
通利奉持爲人廣說如說修行亦教他人如
說修行如是之人我以一劫若減一劫說其
功德猶不能盡

思益梵天所問經卷第一

永樂北藏

思益梵天所問經

第四二冊

思益梵天所問經卷第二

傷八

姚秦三藏法師鳩摩羅什 譯

如來五力說品第六

佛告梵天汝何能稱說是人功德如如來以無閼智慧之所知乎是人所有功德復過於此若人能於如來所說文字語言章句通達隨順不違不逆和合爲一隨其義理不隨章句言辭而善知言辭所應之相知如來以何言說法以何隨宜說法以何方便說法以何法門說法以何大悲說法梵天若菩薩能知

如來以是五力說法是菩薩能作佛事梵天言何謂如來所用五力佛言一者言說二者隨宜三者方便四者法門五者大悲是名如來所用五力一切聲聞辟支佛所不能及世尊云何名爲說佛言梵天如來說過去法說未來現在法說垢淨法說世間出世間法說有罪無罪法說有漏無漏法說有爲無爲法說我人衆生壽命者法說得證法說生死涅槃法梵天當知是言說如幻人說無決定故如夢中說虛妄見故如響聲說從空出故說

如影衆緣和合故說如鏡中像因不入鏡故說如野馬顛倒見故說如虛空無生滅故當知是說爲無所說諸法相不可說故梵天若菩薩能知此諸言說者雖有一切言說而於諸法無所貪著以無貪著故得無礙辯才以是辯才若恒河沙劫說法無盡無礙諸有言說不壞法性亦復不著不壞法性梵天是名如來言說梵天言何謂如來隨宜佛言如來或垢法說淨淨法說垢菩薩於此應知如來隨宜所說梵天何謂如來垢法說淨不得垢

法性故何謂淨淨法說垢貪著淨法故又梵天我說布施即是涅槃凡夫無智不能善知隨宜所說菩薩應如是思量布施後得大富此中無法可從一念至一念若不從一念至一念即是諸法實相諸法實相即是涅槃持戒是涅槃世八不作不起故忍辱是涅槃念念滅故精進是涅槃無所取故禪定是涅槃不貪味故智慧是涅槃不得相故婬欲是實際法性無欲故瞋恚是實際法性無瞋故愚癡是實際法性無癡故生死是涅槃無退無生故涅槃

槃是生死以貪著故實語是虛妄生語見故
虛妄是實語爲增上慢人故又梵天如來以
隨宜故或自說我是常邊者或自說我是斷
邊者或自說我是無作者或自說我是邪見
者或自說我是不信者或自說我是不知報
恩者或自說我是食吐者或自說我是不受
者如來無有如是諸事而有此說當知是爲
隨宜所說欲令衆生捨增上慢故若菩薩善
通達如來隨宜所說者若聞佛出則便信受
示衆生善業色身果報故若聞佛不出亦信

受諸佛法性身故若聞佛說法亦信受爲喜
樂文字衆生故若聞佛不說法亦信受諸法
位性以不可說故若聞有涅槃亦信受滅顛
倒所起煩惱故若聞無涅槃亦信受諸法無
生相無滅相故若聞有衆生亦信受入世諦
門故若聞無衆生亦信受入第一義故梵天
菩薩如是善知如來隨宜所說於諸音聲無
疑無畏亦能利益無量衆生世尊何謂方便
佛言如來爲衆生說布施得大富持戒得生
天忍辱得端正精進得具諸功德禪定得法

喜智慧得捨諸煩惱多聞得智慧故行十善
道得人天福樂故慈悲喜捨得生梵世故禪
定得如實智慧故智慧得道果故學地得無
學地故辟支佛地得消諸供養故佛地得無
量智慧故涅槃滅一切煩惱故梵天我如是
方便爲衆生讚說是法如來實不得我人衆
生壽命者亦不得施亦不得慳亦不得戒亦
不得毀戒亦不得忍辱亦不得瞋恚亦不得
精進亦不得懈怠亦不得禪定亦不得亂心
亦不得智慧亦不得智慧果亦不得菩提亦

不得涅槃亦不得苦亦不得樂梵天若衆生
聞是法者勤行精進是人爲何利故勤行精
進不得是法若須陀洹果斯陀含果阿那含
果阿羅漢果辟支佛道阿耨多羅三藐三菩
提乃至無餘涅槃亦復不得梵天是名如來
方便說也菩薩於此方便應勤精進令諸衆
生得於法利世尊何謂如來法門佛言眼是
解脫門耳鼻舌身意是解脫門所以者何眼
空無我無我所性自爾耳鼻舌身意空無我
無我所性自爾梵天當知六入皆是解脫門

正行則不虛誑故色聲香味觸法亦復一切
諸法皆入是門所謂空門無相門無作門無
生門無滅門無所從來門無所從去門無退
門無起門性常清淨門離自體門又梵天如
來於一切文字示是解脫門所以者何諸文
字無合無用梵天當知如來於一切文字中
說聖諦說解脫門如來所說法無有垢一切
諸法皆入解脫令住涅槃是名如來說法入
於法門菩薩於此法門應當修學
如來大悲品第七

世尊何謂大悲佛言如來以三十二種大悲
救護衆生何等三十二一切諸法無我而衆
生不信不解如來於此而起大悲一切諸法
無衆生而衆生說有衆生如來於此而起大
悲一切法無壽命者而衆生說有壽命者如
來於此而起大悲一切法無人而衆生說有
人如來於此而起大悲一切法無所有而衆
生住於有見如來於此而起大悲一切法無
住而衆生有住如來於此而起大悲一切法
無歸處而衆生樂於歸處如來於此而起大

悲一切法非我所而衆生著於我所如來於此而起大悲一切法無所屬而衆生計有所屬如來於此而起大悲一切法無取相而衆生有取相如來於此而起大悲一切法無生而衆生住於有生如來於此而起大悲一切法無退生而衆生住於退生如來於此而起大悲一切法無垢而衆生著垢如來於此而起大悲一切法離染而衆生有染如來於此而起大悲一切法離瞋而衆生有瞋如來於此而起大悲一切法離癡而衆生有癡如來

於此而起大悲一切法無所從來而衆生著有所來如來於此而起大悲一切法無所去而衆生著於後生如來於此而起大悲一切法無起而衆生計有所起如來於此而起大悲一切法無戲論而衆生著於戲論如來於此而起大悲一切法空而衆生墮於有見如來於此而起大悲一切法無相而衆生著於有相如來於此而起大悲一切法無作而衆生著於有作如來於此而起大悲世間常共瞋恚諍競如來於此而起大悲世間邪見顛

倒行於邪道欲令住於正道如來於此而起
大悲世間饕餮無有厭足互相陵奪欲令衆
生住於聖財信戒聞施慧等如來於此而起
大悲衆生是產業妻子恩愛之僕於此危脆
之物生堅固想欲令衆生悉知無常如來於
此而起大悲衆生身為怨賊貪著養育以為
親友欲為衆生作真知識令畢衆苦究竟涅
槃如來於此而起大悲衆生好行欺誑邪命
自活欲令衆生行於正命如來於此而起大
悲衆生樂著衆苦不淨居家欲令衆生出於

三界如來於此而起大悲一切諸法從因緣
有而衆生於聖解脫而生懈怠我當為說精
進令樂解脫如來於此而起大悲衆生棄捨
最上無礙智慧求於聲聞辟支佛道我當引
導令發大心緣於佛法如來於此而起大悲
梵天如來如是於諸衆生行此三十二種大
悲是故如來名為行大悲者若菩薩於衆生
中常能修集此大悲心則為阿鞞跋致為大
福田威德具足常能利益一切衆生說是大
悲法門品時三萬二千人皆發阿耨多羅三

藐三菩薩提心八千菩薩得無生法忍

幻化品第八

爾時網明菩薩摩訶薩白佛言世尊是思益梵天云何聞大悲法而不喜悅思益言善男子若識在二法則有喜悅若識在無二實際法中則無喜悅譬如幻人見幻戲事無所喜悅菩薩知諸法相如是則於如來若說法若神通亦無喜悅又善男子如佛所化人聞佛說法不喜不悅菩薩知諸法相與化無異於如來所不加喜悅於餘衆生無下劣想網明

言梵天汝今見諸法如幻相耶梵天言若人分別諸法者汝當問之網明言汝今於何處行梵天言一切凡夫行處吾於彼行網明言凡夫人行貪欲瞋恚愚癡身見疑網行我我所等邪道汝於是處行耶梵天言善男子汝欲得凡夫法決定相耶網明言我尚不欲決定得凡夫何況凡夫法善男子若是法無決定者寧有貪欲瞋恚愚癡法耶網明言無也善男子一切法離貪瞋癡相行相亦如是善男子凡夫行賢聖行皆無二無差別善男子

傷八

七

一切行非行一切說非說一切道非道網明
言何謂一切行非行梵天言善男子若人千
萬億劫行道於法性不增不減是故言一切
行非行何謂一切說非說梵天言善男子如
來以不可說相說一切法是故言一切說非
說何謂一切道非道梵天言以無所至故一
切道非道爾時世尊讚思益梵天言善哉善
哉說諸法相應當如是網明菩薩謂梵天言
汝說一切凡夫行處吾於彼行者則有行相
梵天言若我有所生處應有行相網明言汝

若不生云何教化衆生梵天言佛所化生吾
如彼生網明言佛化所生則無生處梵天言
寧可見不網明言以佛力故見梵天言我生
亦如是以業力故網明言汝於起業中行耶
梵天言我不於起業中行網明言云何言以
業力故梵天言如業性力亦如是是二不出
於如爾時舍利弗白佛言世尊若有能入是
菩薩隨宜所說法中者得大功德所以者何
世尊乃至聞是上人名字尚得大利何況聞
其所說譬如樹不依於地在虛空中而現

根莖枝葉華果甚爲希有此人行相亦復如是不住一切法而於十方現有行有生死亦有如是智慧辯才世尊若有善男子善女人聞是智慧自在力者其誰不發阿耨多羅三藐三菩提心爾時有一菩薩名曰普華在會中坐謂長老舍利弗仁者已得法性佛亦稱汝於智慧人中爲最第一何以不能現如是智慧辯才自在力耶舍利弗言普華佛諸弟子隨其智力能有所說普華言舍利弗法性有多少耶舍利弗言無也普華言汝何以言

佛諸弟子隨其智力能有所說舍利弗言隨所得法而有所說普華言汝證法性無量相耶舍利弗言然普華言汝云何言隨所得法而有所說如法性無量相得亦如是如得說亦如是何以故法性無量故舍利弗言法性非得相普華言若法性非得相者汝出法性得解脫耶舍利弗言不也普華言何故爾耶舍利弗言若出法性得解脫者則壞法性普華言是故舍利弗如仁得道法性亦爾舍利弗言我爲聽來非爲說也普華言一切法皆

入法性此中寧有說有聽者不舍利弗言不
也普華言若然者汝何故言我為聽來非為
說也舍利弗言佛說二人得福無量一者專
精說法二者一心聽受是故汝今應說我當
聽受普華言汝入滅盡定能聽法耶舍利弗
言入滅盡定無有^{第八}二行而聽法也普華言汝^九
信佛說一切法是滅盡相不舍利弗言然一
切法皆滅盡相我信是說普華言若然者舍
利弗常不能聽法所以者何一切法常滅盡
相故舍利弗言汝能不起於定而說法耶普

華言頗有一法非是定耶舍利弗言無也普
華言是故當知一切凡夫常在於定舍利弗
言以何定故一切凡夫常在定耶普華言以
不壞法性三昧故舍利弗言若然者凡夫聖
人無有差別普華言如是如是我欲令凡
夫聖人有差別也所以者何聖人無所斷凡
夫無所生是二不出法性平等之相舍利弗
言何等是諸法平等相普華言如舍利弗所
得知見舍利弗汝生賢聖法耶答言不也汝
滅凡夫法耶答言不也汝得賢聖法耶答言

不也汝見凡夫法耶答言不也舍利弗汝何知見說言得道答言汝不聞凡夫如即是漏盡解脫如漏盡解脫如即是無餘涅槃如舍利弗是如名不異如不壞如應以是如知一切法爾時舍利弗白佛言世尊譬如大火一切諸燄皆是燒相如是諸善男子所說法皆入法性佛告舍利弗如汝所言是諸善男子所說法皆入法性爾時網明謂舍利弗佛說仁者於智慧人中爲最第一以何智慧得第一乎舍利弗言所謂聲聞因聲得解以是智

慧說我於中爲第一耳非謂菩薩網明言智慧是戲論相耶答言不也網明言智慧非平等相耶答言是網明言今仁者得平等智慧云何說智慧有量答言善男子以法性相故智慧無量隨入法性多少故智慧有量網明言無量法終不作有量仁者何故說智慧有量即時舍利弗默然不答

菩薩光明品第九

爾時長老迦葉承佛聖旨白佛言世尊是網明菩薩以何因緣號網明乎佛告網明善

男子現汝福報光明因緣今諸天人一切世間皆得歡喜其有福德因緣者當發菩提心於是網明即受佛教偏袒右肩從右手赤白莊嚴爪指間放大光明普照十方無量無邊阿僧祇佛國皆悉通達其中地獄畜生餓鬼盲聾瘖瘂手足拘攣老病苦痛貪欲瞋恚愚癡裸形醜陋貧窮饑渴囹圄繫閉困厄垂死慳貪破戒瞋恚懈怠妄念無慧少於聞見無慚無愧墮邪疑網如是等衆生遇斯光者皆得快樂無有衆生爲貪欲瞋恚愚癡憍慢憂

愁懷恨等之所惱也其在佛前大會之衆菩薩摩訶薩天龍夜叉乾闥婆等及比丘比丘尼優婆塞優婆夷衆是諸衆生同一金色與佛無異有三十二相八十隨形好無見頂者皆坐寶蓮華座寶交絡蓋羅覆其上等無差別諸會衆生皆得快樂譬如菩薩入發喜莊嚴三昧時諸大衆得未曾有各各相見如佛無異不見佛身爲大已身爲小又以光明力故尋時下方有四菩薩從地涌出合掌而立欲共禮佛作是念言何者真佛我欲禮敬即

佛八

十一

聞空中聲曰是網明菩薩光明之力一切大衆同一金色與佛不異時四菩薩發希有心作如是言今此會中其色無異一切諸法亦復如是若我此言誠實無虛世尊釋迦牟尼當現異相令我今得供養禮事即時佛以蓮華寶師子座上昇虛空高一多羅樹於是四菩薩頭面禮佛足作如是言如來智慧不可思議網明菩薩福德本願亦不可思議能放如是無量光明爾時佛告網明菩薩言善男子汝今已作佛事令無量衆生住於佛道可

攝光明於是網明菩薩即受佛教還攝光明攝光明已此諸大衆威儀色相還復如故見佛坐本師子座上爾時長老迦葉白佛言世尊此四菩薩從何所來四菩薩言我等從下方世界來迦葉言其國何名佛號何等四菩薩言國名現諸寶莊嚴佛號一寶蓋今現在說法大迦葉言其佛國土去此幾何四菩薩言佛自知之大迦葉言汝等何故來此四菩薩言是網明菩薩光明照彼我等遇之即聞釋迦牟尼佛名及網明菩薩是故我等

今來見佛并網明上人迦葉白佛言世尊一
寶蓋佛現諸寶莊嚴世界去此幾何佛言去
此七十二恒河沙佛土大迦葉言世尊是四
菩薩從彼發來幾時至此佛言如一念頃於
彼不現忽然而至大迦葉言世尊此諸菩薩
光明遠照神通速疾甚為希有今網明菩薩
光明遠照是四菩薩發來速疾佛言迦葉如
汝所說菩薩摩訶薩所行不可思議一切聲
聞辟支佛所不能及爾時長老迦葉謂網
明菩薩言善男子汝現光明照此大會皆作

傷八

十二

金色以何因緣網明言長老迦葉可問世
尊當為汝說即時大迦葉以此白佛佛言迦
葉是網明菩薩成佛時其會大眾同一金色
咸共信樂一切智慧其佛國土乃至無聲聞
辟支佛名唯有清淨諸菩薩摩訶薩會大迦
葉白佛言世尊生彼菩薩當知如佛等無有
異佛言如汝所說生彼菩薩當知如佛於是
會中四萬四千人皆發阿耨多羅三藐三菩
提心已願生彼國白佛言世尊若網明菩薩
得成佛時我等當生其國爾時長老迦葉

白佛言世尊網明菩薩幾時當得阿耨多羅
三藐三菩提佛言迦葉汝自問網明於是迦
葉問網明菩薩言善男子仁者幾時當得阿
耨多羅三藐三菩提網明言大迦葉若有問
幻所化人汝幾時當得阿耨多羅三藐三菩
提是幻人當云何答大迦葉言善男子幻所
化人無決定相當何所答網明言大迦葉一
切諸法亦如幻所化人無決定相誰可問言
汝幾時當成阿耨多羅三藐三菩提大迦葉
言善男子幻所化人離於自相無異無別無

所志願汝亦如是耶若如是者汝云何能利
益無量衆生網明言阿耨多羅三藐三菩提
即是一切衆生性一切衆生性即是幻性幻
性即是一切法性於是法中我不見有利不
見無利大迦葉言善男子汝今不令衆生住
菩提耶網明言諸佛菩提有住相耶大迦葉
言無也網明言是故我不令衆生住於菩提
亦不令住聲聞辟支佛道大迦葉言善男子
汝今欲趣何所網明言我所趣如如趣大迦
葉言如無所趣亦無有轉網明言如如無趣

無轉一切法住如相故我無趣無轉大迦葉
言若無趣無轉汝云何教化衆生網明言若
人發願則是不能教化衆生若人於法有轉
是亦不能教化衆生大迦葉言善男子汝不
轉衆生生死耶網明言我尚不得生死何況
於生死中而轉衆生大迦葉言汝不令衆生
得涅槃耶網明言我尚不見涅槃何況教化
衆生令住涅槃大迦葉言善男子若汝不得
生死不見涅槃何故今為無量衆生行於菩
提此豈不為滅度衆生耶網明言若菩薩得

生死分別涅槃因衆生行菩提此則不應說
為菩薩大迦葉言善男子汝今於何處行網
明言我非生死中行非涅槃中行亦不以衆
生相行大迦葉如汝所問汝何處行者如佛
所化人行處傷吾於彼行大迦葉言佛所化人
無有行處網明言當知一切衆生十四所行亦如
是相大迦葉言佛所化人無貪無恚無癡若
一切衆生所行如是相者衆生貪恚癡從何
所起網明言我今問汝隨意答我大迦葉汝
今寧有貪恚癡不答言無也網明言是貪恚

癡盡滅耶答言不也網明言若大迦葉今無貪恚癡亦不盡滅者汝置貪瞋癡於何所耶答言善男子凡夫從顛倒起妄想分別生貪恚癡耳賢聖法中善知顛倒實性故無妄想分別是以無貪恚癡大迦葉於汝意云何若法從顛倒起是法爲實爲虛妄耶答言是法虛妄非是實也網明言若法非實可令實耶答言不也網明言若法非實仁者欲於是中得貪恚癡耶答言不也網明言若然何者是貪恚癡能惱衆生者答言善男子若爾者一

切從本已來離貪恚癡相網明言以是故我說一切法相如佛所化說是法時四萬四千菩薩得柔順法忍

菩薩受記品第十

爾時長老^{傷八}大迦葉白佛言世尊若網明菩薩

十五

所見衆生不應復畏墮三惡道若聞網明所說法者魔不得便若爲網明所教化者不畏墮聲聞辟支佛道世尊願說網明功德莊嚴國土佛言迦葉是網明菩薩在在國土遊行之處利益無量衆生迦葉汝見網明所放光

明不答言已見佛言若三千大千世界滿中芥子尚可算數今網明光明令諸衆生住菩提者不可數也迦葉是網明菩薩所放光明饒益尚爾何況說法汝今諦聽我當粗畧說其功德迦葉是網明菩薩過七百六十萬阿僧祇劫當得作佛號普光自在王如來應供正徧知世界曰集妙功德其佛趣菩提樹時國中諸魔魔民悉皆正定於阿耨多羅三藐三菩提其佛國土以真栴檀寶爲地地平如掌柔軟細滑如加陵伽衣處處皆以衆寶莊

嚴無三惡道亦無八難其國廣長皆以妙寶蓮華色香且好以爲校飾普光自在王如來有無量菩薩僧善修無量法門得無量自在神通皆以光明莊嚴其身得諸陀羅尼藏無量辯才善能說法光明神力皆悉通達能破魔怨慚愧念慧諸妙功德以修其心彼佛國土無有女人其諸菩薩皆於寶蓮華中結跏趺坐自然化生以禪樂爲食諸所須物經行之處房舍牀榻園林浴池應念即至迦葉是普光自在王如來不以文字說法但放光明

照諸菩薩即得無生法忍其佛光明復照十方通達無礙令諸衆生得離煩惱又其光明常出三十二種清淨法音何等三十二所謂諸法空無衆生見故諸法無相離分別故諸法無作出三界故諸法離欲性寂滅故諸法離瞋無有礙故諸法離癡無闇冥故諸法無所從來本無生故諸法無所去無所至故諸法不住無所依故諸法過三世去來現在無所有故諸法無異其性一故諸法不生離於報故諸法無業業報作者不可得故諸法不

傷八

十六

作無所起故諸法無起無爲性故諸法無爲離生滅故諸法真不從和合生故諸法實一道門故諸法無衆生衆生不可得故諸法無我第一義故諸法鈍無所知故諸法捨離憎愛故諸法離煩惱無有熱故諸法無垢性不汙故諸法一相離欲際故諸法離相常定故諸法住實際性不壞故諸法如相不分別故諸法入法性徧入故諸法無緣諸緣不合故諸法是菩提如實見故諸法是涅槃無因緣故迦葉普光自在王如來光明常出如是清

淨法音亦能令諸菩薩施作佛事其佛國土
無有魔事佛壽無量阿僧祇劫大迦葉白佛
言若人欲得清淨佛土者應取如網明菩薩
所修功德具足清淨國土如是迦葉網明菩
薩於諸無量阿僧祇佛所隨所願修功德具
足故爾時思益梵天謂網明菩薩仁者已得
從佛受記網明言一切衆生皆從佛受記梵
天言於何事中而得受記網明言隨業受報
而得受記梵天言汝作何業而得受記網明
言若業非身作非口作非意作是業可得示

佛八

十七

不梵天言不可示也網明言菩提是起作相
耶梵天言不也何以故菩提是無爲非起作
相網明言可以起作相得無爲菩提不梵天
言不也梵天是故當知若無業無業報無諸
行無起諸行是名菩提如菩提性得亦如是
如得性受記亦如是不可以起作法而得受
記梵天言善男子汝不行六波羅蜜然後得
受記耶網明言如汝所說菩薩行六波羅蜜
而得受記梵天若菩薩捨一切煩惱名爲檀
波羅蜜於諸法無所起名爲尸羅波羅蜜於

諸法無所傷名為羣提波羅蜜於諸法離相
名為毗梨耶波羅蜜於諸法無所住名為禪
波羅蜜於諸法無戲論名為般若波羅蜜梵
天菩薩如是行六波羅蜜於何處行梵天言
無處行也所以者何凡有所行皆是不行若
行即是不行若不行即是行梵天以是故當
知無所行是菩提如汝所問汝得受菩提記
者如如法性得受記我所受記亦如是梵天
言善男子如如法性無受記網明言諸菩薩
受記相皆亦如是如如法性爾時思益梵天

白佛言世尊菩薩以何行諸佛授阿耨多羅
三藐三菩提記佛言若菩薩不行生法不行
滅法不行善不行不善不行世間不行出世
間不行有罪法不行無罪法不行有漏法不
行無漏法不行有為法不行無為法不行修
道不行除斷不行生死不行涅槃不行見法
不行聞法不行覺法不行知法不行施不行
捨不行戒不行覆不行忍不行善不行發不
行精進不行禪不行三昧不行慧不行行不
行知不行得梵天若菩薩如是行者諸佛則

授阿耨多羅三藐三菩提記所以者何諸所有行皆有所是無所是是菩提諸所有行皆是分別無分別是菩提諸所有行皆是起作無起作是菩提諸所有行皆是戲論無戲論是菩提是故當知若菩薩過諸所行則得受記唯然世尊受記者有何義佛言離諸法二相故是受記義不分別生滅是受記義離身口意業相是受記義梵天我念過去有劫名善見我於此劫供養七十二那由他佛是諸如來不見授記又過是劫劫名善化我於此

劫供養二十二億諸佛是諸如來亦不見授記又過是劫劫名梵歎我於此劫供養萬八千佛是諸如來亦不見授記又過是劫劫名無咎我於此劫供養三萬二千佛是諸如來亦不見授記又過是劫劫名莊嚴我於此劫

海八

十九

供養四百四十萬佛我皆以一切供養之具而供養之是諸如來亦不見授記梵天我於往昔供養諸佛恭敬尊重讚歎淨修梵行一切布施一切持戒及行頭陀離於瞋恚忍辱慈心如所說行勤修精進一切所聞皆能受

持獨處遠離入諸禪定隨所聞慧讀誦思問
是諸如來亦不見授記何以故依止所行故
以是當知若諸菩薩出過一切諸行則得受
記我若以一劫若減一劫說是諸佛名號不
可得盡梵天我於是後見然燈佛即得無生
法忍佛時授我記言汝於來世當得作佛號
釋迦牟尼如來應供正徧知我爾時出過一
切諸行具足六波羅蜜所以者何若菩薩能
捨諸相名為檀波羅蜜能滅諸受持名為尸
羅波羅蜜不為六塵所傷名為羼提波羅蜜

離諸所行名為毗梨耶波羅蜜不憶念一切
法名為禪波羅蜜能忍諸法無生性名為般
若波羅蜜我於然燈佛所具足如是六波羅
蜜
薩婆若品第十一

梵天我從初發菩提心已來所作布施於此
五華布施百分不及一百千分百千萬億分
乃至算數譬喻所不能及我從初發心已來
受戒持戒行頭陀於此常滅戒百分不及一
乃至算數譬喻所不能及我從初發心已來

柔和忍辱於畢竟忍法百分不及一乃至算
數譬喻所不能及我從初發心已來發勤精
進於不取捨精進百分不及一乃至算數
譬喻所不能及我從初發心已來禪定獨處
於此無住禪定百分不及一乃至算數譬喻
所不能及我從初發心已來思惟籌量智慧
於此無戲論智慧百分不及一百千分百千
萬億分乃至算數譬喻所不能及梵天是故
當知我爾時得具足六波羅蜜世尊云何名
具足六波羅蜜梵天若不念施不依止戒不

分別忍不取精進不住禪定不二於慧是名
具足六波羅蜜又問具足六波羅蜜已能滿
足何法佛言具足六波羅蜜已能滿足薩婆
若世尊云何具足六波羅蜜已能滿足薩婆
若梵天布施平等即是薩婆若平等持戒平
等即是薩婆若平等忍辱平等即是薩婆若
平等精進平等即是薩婆若平等禪定平等
即是薩婆若平等智慧平等即是薩婆若平
等以是平等一切法名為薩婆若又梵天
滿足布施相持戒相忍辱相精進相禪定相

智慧相是名薩婆若梵天如是滿足六波羅
蜜能滿足薩婆若世尊云何當知滿足薩婆
若梵天若不受眼不受色不受耳不受聲不
受鼻不受香不受舌不受味不受身不受觸
不受意不受法若不受是内外入名為滿足
薩婆若我得如是滿足薩婆若於眼無所著
於色耳聲鼻香舌味身觸意法無所著是故
如來名為無礙知見薩婆若梵天薩婆若於
法無所受何以故以無用故無用即是無所
有義無所有即是空如虛空義同虛空相是

薩婆若是故於法無所受梵天譬如一切所
作皆因虛空而虛空無所依如是諸智慧皆
從薩婆若出而薩婆若無所依梵天白佛言
世尊所說薩婆若薩婆若者為何謂也梵天
一切所行是智為真智非諸聲聞辟支佛所
及故名薩婆若諸有所行皆能成就故名薩
婆若能破一切所念戲論故名薩婆若諸所
教勅諸所防制如此衆生所行之法皆從中
出故名為薩婆若得諸聖智若學智若無學
智若辟支佛智皆從中出故名為薩婆若正

行故名爲薩婆若能分別一切藥故名薩婆
若能滅一切衆生病故名薩婆若能除一切
煩惱習氣故名薩婆若常在定故名薩婆若
一切法中無疑故名薩婆若一切世間出世
間智慧皆從中出故名薩婆若善知一切智
慧方便相故名薩婆若爾時思益梵天白佛
言未曾有也世尊諸佛如來智慧甚深心無
所緣而知一切衆生心心所行世尊薩婆若
得如是無量功德其誰善男子善女人不發
阿耨多羅三藐三菩提心於是網明菩薩白

佛言世尊若有菩薩希望功德利益而發菩
提心者不名發大乘也所以者何一切法無
功德利以無對處故世尊菩薩摩訶薩不應
爲功德利故發菩提心但爲大悲心故滅衆
生諸苦惱故不自憂苦故生諸善法故解脫
諸邪見故滅除諸病故捨我所貪著故不觀
憎愛故不沒世法故厭患有爲故安住涅槃
故發菩提心世尊菩薩不應於衆生求其恩
報亦不應觀作與不作又於苦樂心不傾動
世尊何謂菩薩家清淨佛言善男子菩薩若

傷八

廿二

思益梵天所問經卷第三

傷九

姚秦三藏法師鳩摩羅什譯

菩薩無二品第十二

爾時思益梵天白佛言世尊是文殊師利法王子在此大會而無所說佛即告文殊師利汝於此所說法中可少說之文殊師利白佛言世尊佛所得法寧可識不佛言不可識也世尊是法可說可演可論不佛言不可說不可演不可論世尊若是法不可說不可演不可論者則不可示也爾時思益梵天謂文殊

師利汝不為衆生演說法乎文殊師利言梵天法性中有二相耶梵天言無也文殊師利言一切法不入法性耶梵天言然文殊師利言若法性是不二相一切法入法性中云何當為衆生說法梵天言頗有說法亦無二相耶文殊師利言若決定得說者聽者可有說法亦無有二文殊師利如來不說法耶文殊師利言佛雖說法不以二相何以故如來性無二故雖有所說而無二也梵天言若一切法無二其誰為二文殊師利言凡夫貪著我

故分別二耳不二者終不爲二雖種種分別爲二然其實際無有二相梵天言云何識無二法文殊師利言若無二可識則非無二所以者何無二相者不可識也梵天二即是識業不可識法佛所說也是法不爾如所說何以故是法無文字故文殊師利佛所說法終何所至文殊師利言如來說法至無所至梵天言佛所說法不至涅槃耶文殊師利言涅槃可得至耶梵天言涅槃無來處無至處文殊師利言如是佛所說法至無所至梵天言

是法誰聽答言如所說梵天言云何如所說答言如不識不聞梵天言誰能聽如來如是法答言不漏六塵者梵天言誰能知是法答言無識無分別無諍訟者梵天言云何比丘名多諍訟答言是好是惡此名諍訟是理是非理此名諍訟是垢是淨此名諍訟是善是不善此名諍訟是戒是毀戒此名諍訟是應作是不應作此名諍訟以是法得道以是法得果此名諍訟梵天若於法中有高下心貪著所受皆是諍訟佛所說法無有諍訟梵天

佛九

二

樂戲論者無不諍訟樂諍訟者無沙門法樂
沙門法者無有妄想貪著梵天言云何比丘
隨佛語隨佛教答言若比丘稱讚毀辱其心
不動是名隨佛教若比丘不隨文字語言是
名隨佛語又比丘滅一切諸相是名隨佛教
不違於義是名隨佛語若比丘守護於法是
名隨佛教若不違佛語是名隨佛語梵天言
云何比丘能守護法答言若比丘不逆平等
不壞法性是名能守護法梵天言云何比丘
親近於佛答言若比丘於諸法中不見有法

若近若遠是名親近於佛梵天言云何比丘
給侍於佛答言若比丘身口意無所作是名
給侍於佛梵天言誰能供養佛答言不起福
業不起不動業者梵天言誰能見佛答言若
不著肉眼不著天眼不著慧眼是名能見佛
梵天言誰能見法答言不逆諸因緣法者梵
天言誰能順見諸因緣法答言不起平等不
見平等所生相者梵天言誰得真智答言不
生不滅諸漏者梵天言誰能隨學如來答言
不起不受不取不捨諸法者梵天言誰名正

行答言不墮三界者梵天言誰為善人答言
不受後身者梵天言誰為樂人答言無我無
我所者梵天言誰為得解脫者答言不壞縛
者梵天言誰為得度答言不住生死不住涅槃者梵天言漏盡比丘盡何事耶答言若有
所盡不名漏盡知諸漏空相隨如是知名為
漏盡梵天言誰為實語答言離諸言論道者
梵天言誰為入道答言凡夫有入道聖行者
知一切有為法無所從來無所從去則無入
道梵天言誰能見聖諦答言無有見聖諦者

所以者何隨所有見皆為虛妄無所見者乃
名見諦梵天言不見何法名為見諦答言不
見一切諸見名為見諦梵天言是諦當於何
求答言當於四顛倒中求梵天言何故作如
是說答言求四顛倒不得淨不得常不得樂
不得我若不得淨是即不淨若不得常是即
無常若不得樂是即為苦若不得我是即無
我梵天一切法空無我是為聖諦若能如是
求諦是不見苦不斷集不證滅不修道梵
天言云何名修道答言若不分別是法是非

法離於二相名為修道以是道求一切法不得是名為道是道不令人離生死至涅槃所以者何不離不至乃名聖道爾時有摩訶羅梵天子名曰等行問文殊師利何謂優婆塞歸依佛歸依法歸依僧答言若優婆塞不起

傷九

二見不起我見不起彼見不起我見不起佛見不起我見不起法見不起我見不起僧見是名歸依佛歸依法歸依僧又優婆塞不以色見佛不以受想行識見佛是名歸依佛若優婆塞於法無所分別亦不行非法是名歸

依法若優婆塞不離有為法見無為法不離無為法見有為法是名歸依僧又優婆塞不得佛不得法不得僧是名歸依佛歸依法歸依僧爾時等行菩薩問文殊師利言是諸菩薩發菩提心者為何所趣答言趣於虛空所以者何阿耨多羅三藐三菩提同虛空故等行言云何菩薩名發阿耨多羅三藐三菩提心答言若菩薩知一切發非發一切法非法一切眾生非眾生是名菩薩發阿耨多羅三藐三菩提心

名字義品第十三

爾時等行菩薩白佛言世尊所言菩薩菩薩者為何謂耶佛言善男子若菩薩於邪定衆生發大悲心於正定衆生不見殊異故言菩薩所以者何菩薩不爲正定衆生不爲不定衆生故發心傷九但爲度邪定衆生故而起大悲發阿耨多羅三藐三菩提心故名菩薩爾時菩提菩薩白佛言世尊我亦樂說所以爲菩薩佛言若樂說者便說菩提菩薩言譬如男子女人受一日戒無毀無缺若菩薩如是從

初發心乃至成佛於其中間常修淨行是名菩薩堅意菩薩言若菩薩成就深固慈心是名菩薩度衆生菩薩言譬如橋船度人不倦無有分別若心如是是名菩薩斷惡道菩薩言若菩薩於諸佛國投足之處即時一切惡道皆滅是名菩薩觀世音菩薩言若菩薩衆生見者即時必定於阿耨多羅三藐三菩提又稱其名得免衆苦是名菩薩得大勢菩薩言若菩薩所投足處震動三千大千世界及魔宮殿是名菩薩無疲倦菩薩言若恒河沙

等劫爲一日一夜以是三十日爲一月十二
月爲一歲以是歲數若過百千萬億劫得值
一佛如是於恒河沙等佛所行諸梵行修集
功德然後受阿耨多羅三藐三菩提記心不
休息無有疲倦是名菩薩導師菩薩言若菩
薩於墮邪道衆生生大悲心令入正道不求
恩報是名菩薩須彌山菩薩言若菩薩於一
切法無所分別如須彌山一切衆色是名菩
薩那羅延菩薩言若菩薩不爲一切煩惱所
壞是名菩薩心力菩薩言若菩薩以心思惟

一切諸法無有錯謬是名菩薩師子遊步自
在菩薩言若菩薩於諸論中不怖不畏得深
法忍能使一切外道怖畏是名菩薩不可思
議菩薩言若菩薩知心相不可思議無所思
惟分別是名菩薩善寂天子言若菩薩能於
一切天宮中生而無所染亦不得是無染之
法修九是名菩薩實語菩薩言若菩薩有所發言
常以真實乃至夢中亦無妄語是名菩薩喜
見菩薩言若菩薩能見一切色皆是佛色是
名菩薩常慘菩薩言若菩薩見墮生死衆生

其心不樂世間諸樂欲自度己身亦度衆生
是名菩薩心無礙菩薩言若菩薩於一切煩
惱衆魔而不瞋礙是名菩薩常喜根菩薩言
若菩薩常以喜根自滿其願亦滿他願所作
皆辦是名菩薩散疑女菩薩言若菩薩於一
切法中不生疑悔是名菩薩師子童女菩薩
言若菩薩無男法無女法而現種種色身爲
成就衆生故是名菩薩寶女菩薩言若菩薩
於諸寶中不生愛樂但樂三寶是名菩薩毗
舍佉達多優婆夷言若菩薩有所得者則無

善提若不得一切法不生一切法不滅一切
法是名菩薩跋陀婆羅賢士言若菩薩衆生
聞其名者畢定於阿耨多羅三藐三菩提是
名菩薩寶月童子言若菩薩常修童子梵行
乃至不以心念五欲何況身受是名菩薩忉
利天子曼陀羅華香菩薩言若菩薩持戒熏
心常流諸善法香不流餘香是名菩薩作喜
菩薩言若菩薩喜樂三法謂供養佛演說於
法教化衆生是名菩薩思益梵天言若菩薩
所見之法皆是佛法是名菩薩彌勒菩薩言

值九

七

若菩薩衆生見者即得慈心三昧是名菩薩
文殊師利法王子言若菩薩雖說諸法而不
起法想不起非法想是名菩薩網明菩薩言
若菩薩光明能滅一切衆生煩惱是名菩薩
普華菩薩言若菩薩見諸如來滿十方世界
如林華敷是名菩薩如是諸菩薩各各隨所
樂說已爾時佛告等行菩薩言若菩薩能代
一切衆生受諸苦惱亦復能捨一切福事與
諸衆生是名菩薩

爾時思益梵天問等行菩薩言善男子汝今
以何行爲行答言我已隨一切有爲法衆生
行爲行又問隨一切有爲法衆生以何爲行
答言諸佛所行是隨一切有爲法衆生行也
又問諸佛以何爲行答言諸佛以第一義空
爲行又問凡夫所行諸佛亦以是行有何差
別等行言汝欲令空中有差別耶答言不也
等行言如來不說一切法空耶答言然是故
梵天一切法無有差別是諸行相亦復如是
所以者何如來不說諸法有差別也爾時思

益梵天問文殊師利言所言行處行為何謂也答言於諸行中有四梵行是名行處行若人離四梵行不名行處行能行四梵行是名行處行梵天若人成就四梵行雖於空閑曠野中行是名行處行若不成就四梵行雖於樓殿堂閣金銀牀榻妙好被褥於此中行不得九名行處行亦復不能善知行處相又問菩薩以何行知見清淨答言於諸行中能淨我見又問若得我實性即得實知見耶答言然若見我實性即是實知見譬如國王典金藏人

因已出用知餘在者如是因知我實性故得實知見又問云何得我實性答言若得無我法所以者何我畢竟無根本無決定故若能如是知者是名得我實性又問如我解文殊師利所說義以見我故即是見佛所以者何我性即是佛性文殊師利誰能見佛答言不壞我見者所以者何我見即是法見以法見能見佛又問頗有無所行名爲正行耶答言有若不行一切有爲法是名正行又問云何行名爲正行答言若不爲見故行不爲斷不

爲證不爲修故行是名正行又問慧眼爲見何法答言若有所見不名慧眼慧眼不見有爲法不見無爲法所以者何有爲法皆虛妄分別無虛妄分別是名慧眼無爲法空無所有過諸眼道是故慧眼亦不見無爲法又問頗有因緣正行比丘不得道果答言有正行中無道無果無行無得無有得果差別梵天無所得故乃名爲得若有所得當知是爲增上慢人正行者無增上慢無增上慢則無行無得又問得何法故名爲得道答言若法不

佛九

九

自生不他生亦不衆緣生從本已來常無有生得是法故說名得道又問若法不生爲何所得答言若知法不生即名爲得是故佛說若見諸有爲法不生相即入正位又問云何名正位答言我及涅槃等不作二是名正位又行平等故名爲正位以平等出諸苦惱故名正位入了義中故名正位除一切憶念故名正位爾時世尊讚文殊師利言善哉善哉快說此言誠如所說說是法時七千比丘不受諸法漏盡心得解脫三萬二千諸天遠塵

離垢得法眼淨十千人離欲得定二百人發
阿耨多羅三藐三菩提心五百菩薩得無生
法忍爾時思益梵天白佛言世尊是文殊師
利法王子能作佛事大饒益衆生文殊師利
言佛出於世不爲益法故出不爲損法故出
梵天言佛豈不滅度無量衆生仁者亦不利
益無量衆生耶文殊師利言汝欲於無衆生
中得衆生耶答言不也梵天汝欲得衆生決
定相耶答言不也梵天汝欲得諸佛有出生
相於世間耶答言不也梵天何等是衆生爲

佛所滅度者梵天言如仁者所說義無生死
無涅槃文殊師利言如是諸佛世尊不得生
死不得涅槃佛諸弟子得解脫者亦不得生
死不得涅槃所以者何是涅槃是生死但假
名字有言說耳實無生死往來滅度涅槃又
問誰能信是法耶答言於諸法中無貪著者
又問若貪著者於何貪著答言貪著者貪著
虛妄梵天若貪著是實者終無增上慢以貪
著虛妄故行者知之而不貪著若不貪著則
無有流若無有流則無往來生死若無往來

悔九

十

生死是則滅度又問何故說言滅度答言滅度者名為眾緣不和合若無明不和合諸行因緣則不起諸行若不起諸行是名為滅不起相是畢竟滅得是道故則無生處如是名為四聖諦

如來二事品第十五

爾時等行菩薩謂文殊師利如汝所說皆為真實答言一切言說皆為真實又問虛妄言說亦真實耶答言如是所以者何是諸言說皆為虛妄無處無方若法皆虛妄無處無方

是故一切言說皆是真實善男子提婆達語如來語無異無別所以者何一切言說皆是如來言說不出如故一切言說有所說事皆以無所說故得有所說是以一切言說皆平等文字同故文字無念故文字空故等行言如來不說凡夫語言賢聖語言耶文殊師利言然以文字說凡夫語言亦以文字說賢聖語言如是善男子諸文字有分別凡夫語言是賢聖語言耶等行言不也文殊師利言如諸文字無分別一切賢聖亦無分別是故

賢聖無有言說所以者何賢聖不以文字相
不以衆生相不以法相有所說也譬諸鐘鼓
衆緣和合而有音聲是諸鐘鼓亦無分別如
是諸賢聖善知衆因緣故於諸言說無貪無
礙等行言如佛所說汝等集會當行二事若
說法若聖默然何謂說法何謂聖默然答言
若說法不違佛不違法不違僧是名說法若
知法即是佛離相即是法無爲即是僧是名
聖默然又善男子因四念處有所說名爲說
法於一切法無所憶念名聖默然因四正勤

有所說名爲說法以諸法等不作等不作不
等名聖默然因四如意足有所說名爲說法
若不起身心名聖默然因五根五力有所說
名爲說法若不隨他語有所信爲不取不捨
故分別諸法一心安住無念念中解一切法
常定性斷一切戲論慧名聖默然因七菩提
分有所說名爲說法若常行捨心無所分別
無增無減名聖默然因八聖道分有所說名
爲說法若知說法相如揲喻不依法不依非
法名聖默然善男子於是三十七助道法若

能開解演說名爲說法若身證是法亦不離身見法亦不離法見身於是觀中不見二相不見不二相如是現前知見而亦不見名聖默然又善男子若不妄想著我不妄想著彼不妄想著法有所說名爲說法若至不可說相能離一切言說音聲得不動處入離相心傷九名聖默然又善男子若知一切衆生諸根利鈍而教誨之名爲說法常入於定心不散亂名聖默然等行言如我解文殊師利所說義一切聲聞辟支佛無有說法亦無聖默然所

以者何是人不能了知一切衆生諸根利鈍亦復不能常在於定文殊師利若有真實問何等是世間說法者何等是世間聖默然者則當爲說諸佛是也所以者何諸佛善能分別一切衆生諸根利鈍亦常在定佛告文殊師利如是如是如等行所說唯諸如來有此二法爾時須菩提白佛言世尊我親從佛聞汝等集會當行二事若說法若聖默然世尊若聲聞不能行者云何如來勅諸比丘行此二事佛告須菩提於汝意云何若聲聞不從

他聞能說法能聖默然不須菩提言不也須菩提是故當知一切聲聞辟支佛無有說法無聖默然爾時文殊師利謂須菩提如來了知衆生八萬四千行汝於此中有智慧能隨其所應爲說法不答言不也今須菩提能入

傷九

十三

觀一切衆生心三昧住是三昧通達一切衆生心心所行自心他心無所妨礙不答言不也文殊師利言須菩提如來於衆生八萬四千行隨其所應爲說法藥又常住定平等相中心不動搖而通達一切衆生心心所行須

菩提是故當知一切聲聞辟支佛不及此事須菩提或有衆生多婬欲者以觀淨得解脫不以不淨唯佛能知或有衆生多瞋恚者以觀過得解脫不以慈心唯佛能知或有衆生多愚癡者以不共語得解脫不以說法唯佛能知或有衆生等分行者不以觀淨不以不淨不以觀過不以慈心不以不共語不以說法得解脫者隨其根性以諸法平等而爲說法使得解脫唯佛能知是故如來於諸說法人中爲最第一禪定人中亦最第一爾時須

菩提問文殊師利若聲聞辟支佛不能如是說法不能如是聖默然者諸菩薩有成就如是功德能說法能聖默然不答言唯佛當知於是佛告須菩提有三昧名入一切語言心不散亂若菩薩成就是三昧皆得是功德爾時文殊師利謂等行菩薩善男子爲衆生八萬四千行故說八萬四千法藏名爲說法常在一切滅受想定中名聖默然善男子我若一劫若減一劫演說是義是名說法相是聖默然相猶不能盡於是佛告等行菩薩善男

子乃往過去無量無邊不可思議阿僧祇劫時世有佛號曰普光劫曰名聞國名喜見彼國嚴淨豐樂安隱天人熾盛其地皆以衆寶莊嚴柔輦細滑生寶蓮華一切香樹充滿其中常出妙香善男子喜見國土有四百億四

傷九

十四

昧是以國土名曰喜見若他方世界諸來菩薩皆得快樂餘國不爾善男子其普光佛以三乘法為弟子說亦多樂說如是法言汝等比丘當行二事若說法若聖默然善男子爾時上方醫王佛土有二菩薩一名無盡意二名益意來詣普光佛所頭面禮佛足右繞三匝恭敬合掌却住一面時普光佛為二菩薩廣說淨明三昧所以名曰淨明三昧者若菩薩入是三昧即得解脫一切諸相及煩惱著亦於一切佛法得淨光明是故名為淨明三

昧又前際一切法淨後際一切法淨現在一切法淨是三世畢竟淨無能令不淨性常淨故是以說一切諸法性常清淨何謂諸法性淨謂一切法空相離有所得故一切法無相相離憶想分別故一切法無作相不取不捨

傷九

十五

無求無願畢竟離自性故是名性常清淨以是常淨相知生死性即是涅槃性涅槃性即是一切法性是故說心性常清淨善男子譬如虛空若受垢汙無有是處心性亦如是若有垢汙無有是處又如虛空雖為煙塵雲霧

覆瞠不明不淨而不能染汙虛空之性設染汙者不可復淨以虛空實不染汙故還見清淨凡夫心亦如是雖邪憶念起諸煩惱然其心性不可垢汙設垢汙者不可復淨以心相實不可垢汙汙性常明淨是故心得解脫善男子是名入淨明三昧門彼二菩薩聞是三昧於諸法中得不可思議法光明爾時無盡意菩薩白普光如來言世尊我等已聞入淨明三昧當以何行行此法門佛告無盡意善男子汝等當行二行若說法若聖默然時二菩

薩從佛受教頭面禮佛足繞三匝而出趣一園林自以神力化作寶樓於中修行時有梵天名曰妙光與七萬二千梵俱來至其所頭面禮足問二菩薩善男子普光如來說言汝等比丘集會當行一事若說法若聖默然善男子何謂說法何謂聖默然二菩薩言汝今善聽我當少說唯有如來乃通達耳於是二菩薩以二句義為諸梵眾廣分別說時七萬二千梵皆得無生法忍妙光梵天得普光明三昧是二菩薩於七萬六千歲以無礙辯才

答其所問不懈不息分別二句互相問答而不窮盡於是普光如來在虛空中作如是言善男子勿於文字言說而起諍訟凡諸言說皆空如響如所問答亦復如是汝等二人皆得無礙辯才及無盡陀羅尼若於一劫若百劫說此二句辯不可盡善男子佛法是寂滅相第一之義此中無有文字不可得說諸所言說皆無義利是故汝等當隨此義勿隨文字是二菩薩聞佛教已默然而止佛告等行以是當知菩薩若以辯才說法於百千萬劫

傷九

十六

若過百千萬劫不可窮盡又告等行於意云何彼二菩薩豈異人乎勿造斯觀無盡意者今文殊師利是益意菩薩者今汝身是妙光梵天者今思益梵天是也爾時等行菩薩白佛言未曾有也世尊諸佛菩薩為大饒益如所說行精進眾生世尊其懈怠不能如所說行者雖值百千萬佛無能為也當知從勤精進得出菩提得聖道品第十六爾時文殊師利謂等行菩薩善男子汝知菩

薩云何行名勤精進答言若菩薩能得聖道
名勤精進又問云何行能得聖道答言若於
諸法無所分別如是行者能得聖道又問云
何名為得聖道已答言若行者於平等中見
諸法平等是名得聖道已又問平等可得見
耶答言不也所以者何若平等可見則非平
等思益梵天謂文殊師利若行者於平等中
不見諸法是名得聖道已文殊師利言何故
不見思益言離二相故不見不見即是正見
又問誰能正見世間答言不壞世間相者又

佛九

十七

問云何為不壞世間相答言色如無別無異
受想行識如無別無異若行者見五陰平等
如相是名正見世間又問何等是世間相答
言滅盡是世間相又問滅盡相復可盡耶答
言滅盡相者不可盡也又問何故說言世間
是滅盡相答言世間畢竟盡相是相不可盡
所以者何已盡者不復盡也又問佛不說一
切有為法是盡相耶答言世間是盡相終不
可盡是故佛說一切有為法是盡相又問何
等數名有為法答言以盡相故名有為法又

問有爲法者爲住何所答言無爲性中住又問有爲法無爲法有何差別答言有爲法無爲法文字言說有差別耳所以者何以文字言說言是有爲是無爲若求有爲無爲實相則無差別以實相無差別故又問何等是諸法實相義答言一切法平等無有差別是諸法實相義又問何等爲義答言以文字說令人得解故名爲義所以者何實相義者不如文字所說諸佛雖以文字有所言說而於實相無所增減文殊師利一切言說皆非言說

是故佛語名不可說諸佛不可以言相說故又問云何得說佛相答言諸佛如來不可以色身說相不可以三十二相說相不可以諸功德法說相又問諸佛可離色身三十二相諸功德法而說相耶答言不也所以者何色身如三十二相如諸功德法如諸佛不即是如亦非離如如是可說佛相不失如故又問諸佛世尊得何等故號名爲佛答言諸佛世尊通達諸法性相如故說名爲佛正徧知者志大乘品第十七

傷九

十八

於是等行菩薩白佛言世尊何謂菩薩發行
大乘爾時世尊以偈答言

菩薩不壞色 發行菩提心 知色即菩提

是名行菩提 如色菩提然 等入於如相

不壞諸法性 是名行菩提 不壞諸法性

則為菩提義 是菩提義中 亦無有菩提

正行第一義 是名行菩提 愚於陰界入

而欲求菩提 陰界入即是 離是無菩提

若有諸菩薩 於上中下法 不取亦不捨

是名行菩提 若法及非法 不分別為二

亦不得不二 是名行菩提 若二則有為

非二則無為 離是二邊者 是名行菩提

是人過凡夫 亦不入法位 未得果而聖

是世間福田 行於世間法 處中若蓮華

遵修最上道 是名行菩提 世間所行處

偈九

悉於是中行 世間所貪著 於中得解脫

菩薩無所畏 不沒生死淵 無憂無疲倦

而行菩提道 斯人能善知 法性真實相

是故不分別 是法是非法 行於佛道時

無法可捨離 亦無法可受 是名菩提相

十九

一切法無相	猶若如虛空	終不作是念
是相是可相	善知世所行	徧知方便力
能充滿一切	衆生之所願	常住於平等
護持佛正法	一切無所念	則是如來法
若有佛無佛	是法常住世	能通達是相
是名護持法	諸法之實相	了達知其義
安住於此中	而爲人演說	行於甚深法
魔所不能測	是人於諸法	無所貪著故
願求諸佛慧	亦不著願求	是慧於十方
求之不可得	諸佛慧無礙	不著法非法

若能不着此	究竟得佛道	其諸樂善人
布施轉高尊	捨一切所有	而心不傾動
諸法不可捨	亦復不可取	一切世間法
根本不可得	能知一切法	非施非捨相
是名大施主	於法無所見	是等諸菩薩
不計我我所	是故行施時	不生貪惜心
諸所有布施	皆迴向佛道	布施及菩提
不住是二相	無作無起戒	常住於此中
亦不作念言	我住是持戒	智者知戒相
不生亦不作	是故戒清淨	猶若如虛空

觀身如鏡像	言說如響聲	心則如幻化
不以戒自高	其心常柔輒	安住寂滅性
悉滅一切惡	通達於善法	持戒及毀戒
不得此二相	如是見法性	則持無漏戒
已度忍辱岸	能忍一切惡	於諸衆生類
其心常平等	諸法念念滅	其性常不住
於中無罵辱	亦無有恭敬	若節節解身
其心終不動	知心不在內	亦復不在外
身怨及刀杖	皆從四大起	於地水火風
未曾有傷損	通達於此事	常行忍辱法

傷九

二十

菩薩行如是	衆生不能動	勇猛勤精進
堅住於大乘	是人於身心	而無所依止
雖知生死本	其際不可得	爲諸衆生故
莊嚴大誓願	法無決定性	何許有滅相
本際不可得	爲顛倒故說	法性不可議
常住於世間	若能知如是	不生亦不滅
菩薩念衆生	不解是法相	爲之勤精進
今得離顛倒	諸佛常不得	衆生決定相
而彼弘本願	當觀精進力	思惟一切法
知皆如幻化	不得堅牢相	觀之如虛空

從虛妄分別	貪著生苦惱	為斯開法門
令得入涅槃	為彼行精進	而不壞於法
離法非法故	常行真精進	是等行遠離
了達無諍定	獨處無憤鬧	常畏於生死
樂住於閑居	猶如犀一角	遊戲諸禪定
明達諸神通	心常住平等	處空閑聚落
威儀無變異	恒樂於禪定	信解常定法
及寂滅無漏	其心得解脫	故說常定者
自住平等法	以此導眾生	不違平等行
故說常定者	志念常堅固	不忘菩提心

亦能化眾生	故說常定者	常念於諸佛
真實法性身	遠離色身相	故說常定者
常修念於法	如諸法實相	亦無有憶念
故說常定者	常修念於僧	僧即是無為
離數及非數	常入如是定	悉見十方國
一切群生類	而於眼色中	終不生二相
諸佛所說法	一切能聽受	而於耳聲中
亦不生二相	能於一心中	知諸眾生心
自心及彼心	此二不分別	憶念過去世
如恒河沙劫	是先及是後	亦復不分別

能至無量土	現諸神通力	而於身心中
無有疲倦想	分別知諸法	樂說辯無盡
於無央數劫	開示法性相	智慧度彼岸
善解陰入界	常為衆生說	無取無戲論
善知因緣法	遠離二邊相	知是煩惱因
亦知是淨因	信解因緣法	則無諸邪見
法皆屬因緣	無有定根本	我見與佛見
空見生死見	涅槃之見等	皆無是諸見
無量智慧光	知諸法實相	無間無障礙
是行菩提道	是乘名大乘	不可思議乘

悉容諸衆生	猶不盡其量	一切諸乘中
是乘為第一	如此大乘者	能出生餘乘
餘乘有限量	不能受一切	唯此無上乘
能悉受衆生	若行此無量	虛空之大乘
於一切衆生	無有慳怯心	虛空無有量
亦無有形色	大乘亦如是	無量無障礙
若一切衆生	乘於此大乘	當觀是乘相
寬博多所容	無量無數劫	說大乘功德
及乘此乘者	不可得窮盡	若人聞此經
乃至持一偈	永脫於諸難	得到安隱處

佛九

廿二

敬念此經者	捨是身已後	終不墮惡道
常生人天中	於後惡世時	若得聞是經
我皆與受記	究竟成佛道	若持此經者
佛法在是人	是人在佛法	亦能轉法輪
若人持是經	能轉無量劫	生死諸往來
得近於佛道	若能持是經	精進大智慧
是名極勇猛	能破魔軍衆	我於然燈佛
住忍得受記	若有樂是經	我受記亦然
若人於佛後	能解說是經	佛雖不在世
爲能作佛事		

佛說是偈時五千天子皆發阿耨多羅二藐
三菩提心二千菩薩得樂生法忍十千比丘
不受諸法漏盡心得解脫三萬二千人遠塵
離垢於諸法中得法眼淨

發菩提心品第十八

傷九

卷二

爾時文殊師利法王子白佛言世尊如我解
佛所說義若有人發菩提願是爲邪願所以
者何諸有所得悉皆是邪若計得菩提而發
願者是人諸所作行皆爲是邪所以者何菩
提不在欲界不在色界不在無色界菩提無

有住處不應發願譬如有人願得虛空寧得虛空不佛言不也世尊菩薩亦復如是發同虛空相菩提之願即是發虛空願菩提出過三世非是受相不可願也若菩薩起二相發菩提心作是念生死與菩提昇邪見與菩提昇涅槃盤與菩提昇是則不行菩提法也爾時思益梵天謂文殊師利菩薩云何行名菩提行答言若菩薩行一切法而於法無所行是名行菩提行所以者何出過一切所行是行菩提又問云何出過一切所行是行菩提答

言離眼耳鼻舌身意諸緣相是名出過一切所行又問出過有何義答言不出過平等所以者何一切法平等即是菩提又問云何是發菩提願答言當如菩提又問云何爲菩提答言菩提非過去非未來非現在是故菩薩應以三世清淨心發菩提願梵天如過去未來現在法從本已來常不生不生故不可說如是發願無所發願是發一切願所以者何以是行道能得薩婆若又問何故說言薩婆若答言悉知一切真智慧故名爲薩婆若又

問何等是真智慧答言無變異相如衆生無變異相真智慧亦無變異相又問云何是衆生相答言假名字畢竟離是衆生相如是相則無變異若衆生與菩提異是爲變異如菩提相衆生亦爾是故無變異菩提不可以餘道得但以我平等故菩提平等衆生性無我故如是可得菩提是故菩提無有變異所以者何如虛空無變異相一切諸法亦無變異相爾時思益梵天謂文殊師利如來是實語者能說如是法文殊師利言如來於法無所

佛九

廿四

說何以故如來尚不得諸法何況說法思益言如來豈不分別諸法是世間是出世間是有爲是無爲耶文殊師利言於汝意云何是虛空可說可分別不思益言不也文殊師利言今說虛空名字以所說故有生有滅耶思益言不也文殊師利言如來說法亦復如是不以說故諸法有生有滅如此說法是不可說相亦以此法有所教誨是無所教誨所以者何如說法性不說法性亦如是是故說一切法住於如中如亦無所住爾時釋梵四天

王俱在會中即以天華散於佛上而作是言
世尊若善男子善女人聞文殊師利說法有
信解者當知是八能破魔軍及餘怨敵所以
者何文殊師利今所說法能破一切邪見妄
想世尊若善男子善女人聞於是法不驚不
怖當知是人傷九不從小功德來若是經所在之
處當知此處則為諸佛擁護受用若聞是經
處當知此處轉於法輪是經在所住處聚落
村邑山林曠野塔寺僧房經行之處諸魔外
道貪著之人不能侵擾世尊若人多供養過

去諸佛乃能得聞如是經典世尊我等於此
經中得智慧光明而不能得報佛及文殊師
利思益梵天之恩世尊我等所從聞經於是
法師生世尊想我等常當隨侍說是經者此
善男子常為諸天之所擁護若人書寫是經
讀誦解說時無量諸天為聽法故來至其所
爾時世尊語釋梵四天王等大衆言善哉善
哉如汝所說若三千大千世界滿中珍寶以
為一分聞是經者所得功德以為一分其福
勝彼置是三千大千世界若恒河沙等十方

世界滿中珍寶聞是經者所得功德復勝於彼諸善男子若欲得功德者當聽是經欲得身色端正欲得財富欲得眷屬欲得自在欲得具足天樂人樂欲得名稱欲得多聞憶念堅固正行威儀戒定智慧解達經書欲得善知識欲得三明六通欲得一切善法欲得阿耨多羅三藐三菩提欲得與一切衆生樂具欲得涅槃者當聽是經受持讀誦如法修行廣爲人說諸善男子若行是經者我不見其人不得如是具足快樂善男子我今語汝若

人所從聞是經處若和尚若阿闍黎我不見世間供養之具能報其恩是法出於世間世間供養所不能報是法度於世間世間財物所不能報是法無染染汙之物所不能報諸善男子是法餘無能報唯有一事如說修行

佛九

廿六

若人於此法中能如說修行者是名能報師恩亦爲恭敬於師淨畢報恩是名不空食人信施是則名爲順如來語順如來教是名越度衆流是名過諸險道是名建立勝幢是名能破敵陣是名師子之王無所畏故是名象

王心柔軟故是名牛王外道論師無能壞故
是名醫王能療一切病故是名無所驚怖能
說甚深法故是名能具足捨捨諸煩惱故是
名持清淨戒究竟盡善法故是名得大忍辱離
我我所故是名大精進力於無量劫心無倦
故是名具足禪定常念繫心住一處故是名
有大智慧善解言說諸章句故是名有大功
德以無量福莊嚴身相故是名有大威德能
蔽日月諸光明故是名大力持佛十力故是
名大雲能震法雷故是名大雨滅煩惱塵故

是名爲舍至涅槃故是名大救救生死畏故
是名燈明離無明闇故是名歸趣魔所怖者
之所依故是名衆生究竟之道是名得位坐
道場故是名已得法眼是名見諸法如是名
知空法相故是名安住大悲是名安立大慈
是名不捨一切衆生是名背於小乘是名向
於大乘是名除捨顛倒是名至於平等是名
入於法位是名安住道場是名破壞諸魔是
名轉於法輪諸善男子我若一劫若減一劫
稱揚讚歎說是如說修行功德不能窮盡如

德九

廿七

來之辯亦不可盡爾時會中有天子名不退轉白佛言世尊所說隨法行隨法行者為何謂耶佛告天子隨法行者不行一切法是名隨法行所以者何若不行諸法則不分別正是邪如是行者不行善不行不善不行有漏不行無漏不行世間不行出世間不行有為不行無為不行生死不行涅槃是名隨法行若起法相者是則不名隨法行也若念言我行是法是則戲論不隨法行若不受一切法則隨法行於一切法無憶念無分別無所

行是名隨法行爾時不退轉天子白佛言世尊若能如是隨法行者是人畢竟不復邪行所以者何正行者名為畢竟住邪道者無隨法行住正道者有隨法行世尊行正行者無有邪法所以者何諸法平等無差別故爾時思益梵天謂不退轉天子汝於此中隨法行不答言若世尊所說法中有二相者我當行隨法行今以無二相是隨法行於中行者及所行法俱不可得梵天我以不二法行隨法行離諸分別故如諸法如行是名隨法行思

益言汝未曾見此佛國土耶天子言此佛土
 亦未曾見我思益言此佛土不能思惟分別
 見與不見天子言我亦不思惟分別曾於佛
 土見與不見思益言何人未見能見天子言
 一切凡夫未見聖法位若能入者是為先所
 未見而見是法位相非眼所見非耳鼻舌身
 意識所知但應隨如相見如眼如乃至意如
 法位如亦如是若能如是見者是名正見

勝九

廿八

思益梵天所問經卷第三

音釋

被褥被部廉切寢衣也
 被褥被而蜀切相也
 怨敵怨於衆切拒也
 怨敵怨於衆切拒也
 覆瞋覆敷
 嬌敷

永樂北藏

思益梵天所問經

第四二冊

思益梵天所問經卷第四

傷十

姚秦三藏法師鳩摩羅什譯

師子吼品第十九

爾時釋提桓因白佛言世尊譬如賈客主入於寶洲其所見皆是寶物如是成就不可

傷十

思議功德者有所樂說皆是法寶所樂說者皆示實際所樂說者於諸法中無所貪著不著彼我所樂說者皆是真實無有顛倒所樂說者過去際空未來際不可得現在際不起見所樂說者不信解者得信解信解者得解

脫所樂說者破增上慢無增上慢者自說所作已辦所樂說者魔不得便所聽法者超度魔事所樂說者未生善法令生已生善法令得增長所樂說者已生諸煩惱令斷未生諸煩惱令不生所樂說者未大莊嚴令大莊嚴已大莊嚴者令不退轉所樂說者不斷滅諸法而護佛法世尊以是樂說能降伏一切外道所以者何一切野干不能於師子王前自現其身何況聞其吼世尊一切外道諸論議師不能堪忍無上師子之吼亦復如是爾時

不退轉天子謂釋提桓因憍尸迦所言師子
吼師子吼者為何謂也答言若行者說法無
所貪著是名師子吼若行者貪著所見而有
所說是野干鳴不名師子吼起諸邪見故天
子汝當復說所以為師子吼者天子言憍尸
迦有所說法乃至如來尚不貪著何況餘法
是名師子吼又憍尸迦如說修行名師子吼
決定說法名師子吼說法無畏名師子吼又
憍尸迦若行者為不生不滅不出故說法名
師子吼若為無垢無淨無合無散故說法名

師子吼又憍尸迦師子吼名決定說一切法
無我無眾生師子吼名決定說諸法空師子
吼名守護法故而有所說師子吼名作是願
言我當作佛滅一切眾生苦惱師子吼名於
清淨所須物中少欲知足師子吼名常能不
捨阿蘭若住處師子吼名行施唱導師子吼
名不捨持戒師子吼名等心怨親師子吼名
常行精進不捨本願師子吼名能除煩惱師
子吼名以慧善知所行說是師子吼法時三
千大千世界六種震動百千妓樂不鼓自鳴

傷十

二

其大光明普照天地百千諸天踊躍歡喜言
我等聞不退轉天子說師子吼法於閻浮提
再見轉法輪時佛微笑諸佛常法若微笑時
若干百千種青黃赤白紅紫等光從口中出
普照無量無邊世界上過梵世蔽日月光還
繞身三匝從頂相入於是思益梵天向佛合
掌以偈讚曰

度一切慧最勝尊 悉知三世衆生行
智慧功德及解脫 唯願演說笑因緣
佛慧無量無障礙 聲聞緣覺所不及

知衆生心隨應說 願最上尊說笑緣
佛光可樂淨無穢 普照天 蔽日月
須彌鐵圍及衆山 願無比尊說笑緣
大聖寂然離瞋恨 天人瞻仰無厭足
一切皆蒙得快樂 願為分別說笑緣
通達諸法空無我 第十
水中月影虛空相 願以妙音說笑緣
離分別想諸邪見 了空無相及無作
常樂禪定寂然法 願說放此淨光緣
不著文字言音聲 說不依法及衆生

彼各自謂為我說 願神通智說笑緣
佛為醫王滅衆病 那羅延力救世者
趣捨光明究竟道 天人供養說笑緣
梵行牢強精進品第二十

爾時佛告思益梵天汝見是不退轉天子不
唯然已見梵天此不退轉天子從今已後過
三百二十萬阿僧祇劫當得作佛號須彌燈
王如來應供正徧知明行足善逝世間解無
上士調御丈夫天人師佛世尊世界名妙華
劫名梵歎其佛國土以閻浮檀金瑠璃為地

純以菩薩為僧無諸魔怨所須之物應念即
至佛壽無量不可計歲於是思益梵天謂不
退轉天子如來今已授仁者記天子言梵天
如與如法性授記與我授記亦復如是思益
言如法性不可授記天子言如法性不可授
記者記者當切菩薩授記亦復如是思益言
若如來不與汝記汝於過去諸佛所則為空
住梵行天子言若無所住是住梵行思益言
云何無住而住梵行答言若不住欲界不住
色界不住無色界是住梵行又梵天若住者

不住我不住衆生不住壽命不住人是住梵
行以要言之若不住法不住非法是住梵行
又問梵行有何義答言住不二道是梵行義
又問住不二道爲住何所答言住不二道是
即不住一切諸法所以者何衆賢聖無所住
不取於法能度諸流又問云何爲修道答言
不墮有不墮無亦不分別是有是無習如是
者名爲修道又問以何法修道答言不以見
聞覺知法不以得不以證於一切法無相無
示名爲修道又問何謂菩薩牢強精進答言

若菩薩於諸法不見一相不見異相是名菩
薩牢強精進大莊嚴也於諸法不壞法性故
於諸法無著無斷無增無減不見垢不見淨
出過法性是名菩薩第一牢強精進所謂身
無所起心無所起於是世尊讚不退轉天子
善哉善哉讚已語思梵天言如天子所說
身無所起心無所起是爲第一牢強精進梵
天我念宿世一切所行牢強精進持戒頭陀
於諸師長供養恭敬在空閑處專精行道讀
誦多聞愍念衆生給其所須一切難行苦行

殷勤精進而過去諸佛不見授阿耨多羅三藐三菩提記所以者何我住身口心起精進相故梵天我後得如天子所說牢強精進故然燈佛授我記言汝於來世當得作佛號釋迦牟尼是故梵天若菩薩疾欲授記應當修習如是牢強精進傷十謂於諸法不起精進相世尊何等是不起相精進佛言三世等空精進是名不起相精進世尊云何爲三世等空精進佛言過去心已滅未來心未至現在心無住若法滅不復更起若未至即無生相若無

住即住實相又實相亦無有生若法無生則無去來今若無去來今者則從本已來性常不生是名三世等空精進能令菩薩疾得授記梵天菩薩成就如是法忍者能了達一切法無所捨是名檀波羅蜜了達一切法無漏是名尸羅波羅蜜了達一切法無傷是名羼提波羅蜜了達一切法無所起是名毗梨耶波羅蜜了達一切法平等是名禪波羅蜜了達一切法無分別是名般若波羅蜜若菩薩如是了達則於諸法無增無減無正無邪是

菩薩雖布施不求果報雖持戒無所貪著雖
忍辱知內外空雖精進知無起相雖禪定無
所依止雖行慧無所取相梵天菩薩成就如
是法忍雖示現一切所行而無所染汙是人
得世間平等相不為利衰毀譽稱譏苦樂之
所傾動出過一切世間法故不自高不自下
不喜不感不動不逸無二心離諸緣得無二
法為墮二見法衆生起大悲心為其受身而
教化之梵天是名第一牢強精進所謂得無
我空法忍而於衆生起大悲心為之受身說

是牢強精進相時八千菩薩得無生法忍佛
為授記皆當得阿耨多羅三藐三菩提各於
異土得成佛道皆同一號號堅精進
海喻品第二十一

爾時大迦葉佛言世尊譬如大龍若欲雨
時雨於大海此諸菩薩亦復如是六以大法雨
雨菩薩心佛言迦葉如汝所說諸大龍王所
以不雨閻浮提者非有吝也但以其地不堪
受故所以者何大龍所雨澍如車軸若其雨
者是閻浮提及城邑聚落山林陂池悉皆漂

流如漂棗葉是故大龍不雨大雨於閻浮提如是迦葉此諸菩薩所以不雨法雨於餘衆生者亦無怙心以其器不堪受如是等法是故此諸菩薩但於甚深智慧無量大海菩薩心中雨如是等不可思議無上法雨迦葉又如大海堪受大雨澍如車軸不增不減此諸菩薩亦復如是若於一劫若復百劫若聽若說其法湛然不增不減迦葉又如大海百川衆流入其中者同一鹹味此諸菩薩亦復如是聞種種法種種議論者皆能信解爲一空

味迦葉又如大海澄淨無垢濁水流入即皆清淨此諸菩薩亦復如是淨諸結恨塵勞之垢迦葉又如大海甚深無底此諸菩薩亦復如是能思惟無量法故名爲甚深一切聲聞辟支佛不能測故名爲無底迦葉又如大海傷十集無量水此諸菩薩亦復如是集無量法無量智慧是故說諸菩薩心如大海迦葉又如大海積聚種種無量珍寶此諸菩薩亦復如是入種種法門集諸法寶種種行道出生無量法寶之聚迦葉又如大海有三種寶一者

少價二者有價三者無價此諸菩薩所可說法亦復如是隨諸衆生根之利鈍令得解脫有以小乘而得解脫有以中乘而得解脫有以大乘而得解脫迦葉又如大海漸漸轉深此諸菩薩亦復如是向薩婆若漸漸轉深迦葉又如大海不宿死屍此諸菩薩亦復如是不宿聲聞辟支佛心亦不宿慳貪毀戒瞋恚懈怠亂念愚癡之心亦不宿我人衆生之見迦葉又如劫盡燒時諸小陂池江河泉源在前枯竭然後大海乃當消盡正法滅時亦復

如是諸行小道正法先盡然後菩薩大海之心正法乃滅迦葉此諸菩薩寧失身命不捨正法汝謂菩薩失正法耶勿造斯觀迦葉如彼大海有金剛珠名集諸寶乃至七日出時火至梵世而此寶珠不燒不失轉至他方大海之中若是寶珠在此世界世界燒者無有是處此諸菩薩亦復如是正法滅時七邪法出爾乃至於他方世界何等七一者外道論二者惡知識三者邪用道法四者互相惱亂五者入邪見棘林六者不修福德七者無有

得道此七惡出時是諸菩薩知諸衆生不可得度爾乃至於他方佛國不離見佛聞法教化衆生增長善根迦葉又如大海爲無量衆生之所依止此諸菩薩亦復如是衆生依止得三種樂人樂天樂涅槃之樂迦葉又如大海鹹不可飲此諸菩薩亦復如是諸魔外道不能吞滅於是大迦葉白佛言世尊大海雖深尚可測量此諸菩薩不可測也佛告迦葉三千大千世界微塵猶可知數此諸菩薩功德無量不可數也爾時世尊欲重宣此事而

說偈言

譬如大海能悉受一切衆水無滿時
此諸菩薩亦如是常求法利無厭足
又如大海納衆流一切悉歸無損益
此諸菩薩亦如是聽受深法無增減
又如大海不受濁濁水流入悉清淨
此諸菩薩亦如是不受一切煩惱垢
又如大海無涯底此諸菩薩亦如是
功德智慧無有量一切衆生不能測
又如大海無別異百川流入皆一味

此諸菩薩亦如是 所聽受法同一相
 又如大海所以成 非但為一衆生故
 此諸菩薩亦如是 普為一切發道心
 如海寶名集諸寶 因是寶故有衆寶
 菩薩寶聚亦如是 從菩薩寶出三寶
 如大海出三種寶 傷十 而此大海無分別
 菩薩說法亦如是 三乘度人無彼此
 又如大海漸漸深 此諸菩薩亦如是
 為衆生故修功德 迴向甚深薩婆若
 又如大海不宿屍 此諸菩薩亦如是

發清淨心菩提願 不宿聲聞煩惱心
 如大海有堅牢寶 其寶名曰集諸寶
 劫燒盡時終不燒 轉至他方諸佛國
 正法滅時亦如是 堅精進者能持法
 知諸衆生不可度 轉至他方諸佛國
 三千世界欲壞時 火劫將起燒天地
 百川衆流在前涸 爾乃水王於後竭
 行小道者亦如是 法欲盡時在前滅
 菩薩勇猛不惜身 護持正法後乃盡
 若佛在世滅度後 是心中法寶不滅

深心清淨住是法 以此善法修行道
百千衆生依止海 海成非爲一衆生
菩薩發心亦如是 爲度一切衆生故
十方世界諸大海 猶尚可得測其量
是諸菩薩所行道 聲聞緣覺不能測
迦葉當知諸菩薩 勇猛精進迴向心
願欲作佛度衆生 尚無與等何況勝
是德寶聚如大海 是可供養良福田
是爲最上大醫王 能療一切衆生病
是世歸依作救護 洲渚燈明究竟道

能與世間無明眼 得眼則能服甘露
是爲世間諸法王 是爲帝釋決斷智
是爲梵王行四禪 是爲能轉梵法輪
是爲大智導世師 示諸邪徑正真道
是爲勇猛能破魔 是爲清淨除惱穢
是修白法如滿月^{傷十} 光明高顯猶如日^十
智慧超出如須彌 猶如密雲雨甘露
是無所畏如師子 是心調柔如象王
是則譬如金剛山 一切外道不能壞
是則清淨猶如水 是有威猛如火

是則如風無障礙	是則如地無能動
是拔憍慢我根等	是如藥樹無分別
是持淨戒如蓮華	是於世法無所染
是如優曇鉢羅華	千萬億劫時一出
是為知報佛之恩	是為不斷諸佛種
是為精進行大悲	是用慈喜而超出
是能捨離五欲心	是常求佛法寶財
是行布施為最勝	是持淨戒無等侶
是忍辱健無儔匹	是勤精進無厭倦
是行禪定具神通	能至無量諸佛土

常見諸佛聽受法	如其所聞為人說
是知眾生所行道	隨其性欲根利鈍
是名善知方便力	是然慧燈得濟處
是能善知一切法	皆從和合因緣生
是能決了因緣相	離於我見樂平等
是能正觀於諸法	為從何來至何所
善知諸法無去來	常住法性而不動
是見有為法皆空	增益大悲濟眾生
眾生妄想起眾苦	為欲度故修行道
凡夫分別我我所	行於種種諸邪徑

傷十

十一

是能曉了法實相 爲斷諸見講說法
無常爲常不淨淨 無我謂我苦爲樂
凡夫顛倒貪著故 生死前際不可知
是能知此從顛倒 無我無人無衆生
我當如是修正道 無常樂我及不淨
迦葉當知此菩薩 我所稱讚諸功德
於其所行不可盡 猶如大地舉一塵
若發菩提心不退 三千大千供養具
若復有供過於人 悉應供養如是人
若人發心願作佛 是則恭敬供養我

於去來今十方佛 亦皆恭敬供養已
建立法品第二十二
爾時思益梵天謂文殊師利法王子當請如
來護念斯經於後末世五百歲時令廣流布
文殊師利言於意云何佛於是經有說有示
可護念耶思益言不也梵天是故當知一切
法無說無示無有護念是法終不可滅不可
護念若欲護此法者爲欲護念虛空梵天菩
薩若欲有所受法即非法言所以者何出過
一切言論是名菩薩樂無諍訟梵天若有善

薩於此衆中作是念今說是法當知是人即
非聽法所以者何不聽法者乃爲聽法梵天
言何故說不聽法者乃爲聽法文殊師利言
不漏眼耳鼻舌身意是聽法也所以者何若
於內六入不漏色聲香味觸法中乃爲聽法
爾時會中三萬二千天子五百比丘三百比
丘尼八百優婆塞聞文殊師利所說皆得無
生法忍得是忍已作是言如是如是文殊師
利如仁者所說不聽法者乃爲聽法爾時思
益梵天問得忍諸菩薩言汝等豈不聽是經

悔十

十二

耶諸菩薩言如我等聽以不聽爲聽又問汝
等云何知是法耶答言以不知爲知又問汝
等得何等故名爲得忍思益言以一切法不可
得故我等名爲得忍思益言云何隨是法行
答言以不隨行故隨行又問汝等於此法中
明了通達耶答言一切諸法皆明了通達無
彼我故爾時會中有天子名淨相謂思益梵
天若有但聞此經佛不與授記者我當授其
阿耨多羅三藐三菩提記所以者何此經不
破因果能生一切善法能壞魔怨離諸憎愛

永樂北藏

思益梵天所問經

第四二冊

能令衆生心得清淨能令信者皆得歡喜除
諸瞋恨斯經一切善人之所修行斯經一切
諸佛之所護念斯經一切世間天人阿修羅
所共守護斯經決定至不退轉故斯經不誑
至道場故斯經真實能令衆生得諸佛法斯
經能轉法輪斯經能除疑悔斯經能開聖道
斯經求解脫者所應善聽斯經欲得陀羅尼
者所應善持斯經求福之人所應善說斯經
樂法之人所應善念斯經能與快樂至於涅槃
斯經若魔外道有所得人所不能斷斯經

應受供養人能隨其義斯經能令利根者欣
悅斯經能令智慧者歡喜斯經能與人慧離
諸見故斯經能與人智破愚癡故斯經文辭
次第善說斯經究竟善隨義說斯經多所利
益說第一義斯經愛樂法人之所貪惜斯經
有智之人所不能離斯經施者之大藏斯經
熱惱之涼池斯經能令慈者心等斯經能令
懈怠者精進斯經能令妄念者得定斯經能
與愚者慧明梵天斯經一切諸佛之所貴重
淨相天子說是法時三千大千世界皆大震

動佛即讚言善哉善哉天子如汝所說爾時
思益梵天白佛言世尊是天子曾於過去諸
佛所聞是經耶佛言是天子已於六十四億
佛所得聞是經過四萬二千劫當得作佛號
寶莊嚴國名多寶於其中間有諸佛出皆得
供養亦聞是經梵天是諸比丘比丘尼優婆
塞優婆夷諸天龍鬼神在此會中得法忍者
皆當得生多寶國土爾時淨相天子白佛言
世尊我不求菩提不願菩提不貪菩提不樂
菩提不念不分別菩提云何如來見授記耶

佛告天子如以草木莖節枝葉投於火中而
語之言汝等莫然汝等莫然若以是語而不
然者無有是處天子菩薩亦如是雖不喜樂
貪著菩提當知是人已爲一切諸佛所記所
以者何若菩薩不喜不樂不貪不著不得菩
提則於諸佛必得受阿耨多羅三藐三菩提
記爾時會中有五百菩薩白佛言世尊我等
今不求菩提不願菩提不喜不樂菩提不貪
著菩提不思念菩提不分別菩提作是語已
以佛神力即見上方八萬四千諸佛授其阿

耨多羅三藐三菩提記爾時五百菩薩白佛
言未曾有也世尊如來所說甚善快哉所謂
菩薩不求不願不貪不喜不得菩提而諸佛
授記世尊我等今見上方八萬四千諸佛諸
佛皆與我等授阿耨多羅三藐三菩提記

如來神呪品第二十三

爾時文殊師利白佛言唯願世尊護念是經
於當來世後五百歲廣宣流布此閻浮提令
得久住又令大莊嚴善男子善女人咸得聞
之設魔事種種起而能不隨魔若魔民不得

其便以受持是經故終不退失阿耨多羅三
藐三菩提爾時佛告文殊師利如是如是汝
今善聽欲令此經久住故當為汝說召諸天
龍夜叉乾闥婆鳩槃荼等呪術若法師誦持
此呪則能致諸天龍夜叉乾闥婆阿修羅迦
樓羅緊那羅摩睺羅伽等常隨護之是法師
若行道路若失道時若在聚落若在空中若
在僧坊若在宴室若經行處若在眾會是諸
神等常當隨侍衛護益其樂說辯才又復為
作堅固憶念慧力因緣無有怨賊得其便者

佛十

十五

使是法師行立坐卧一心安詳文殊師利何等爲呪術章句

鬱頭隸 頭頭隸 摩隸 逸隸 魔隸

梯隸 緹隸 彌隸 睺樓 睺樓 睺樓 埤婆隸

韋多隸 麴丘隸 阿那禰 伽帝 摩醯

履摩那 徒摩禰 婆睺乾地 薩波樓帝 羅婆

波 伽帝 卒頭隸 南無佛 馱遮梨帝 隸

南無達摩 涅伽陀禰 南無僧伽和醯 陀毗

波扇陀禰 薩婆波禰 魔帝隸 彌浮提底

薩遮涅提舍 梵嵐摩波舍 多孖利師 鞞

波舍多 阿哆羅提訖提薩婆浮多伽娑呵
呼柰南無佛馱悉纏聞曼哆邏

文殊師利是爲呪術章句若菩薩摩訶薩欲行此經者當誦持是呪術章句應一心行不調戲不散亂舉動進止悉令淨潔不畜餘食少欲知足獨處遠離不樂憤鬧身心遠離常樂慈悲以法喜樂安住實語不欺誑人貴於坐禪樂欲說法行於正念常離邪念常樂頭陀細行之法於得不得無有憂喜趣向涅槃畏猷生死等心憎愛離別異相不怯身命及

一切物無有貪惜威儀成就常樂持戒忍辱
調柔惡言能忍顏色和悅無惡姿容先意問
訊除去憍慢同止歡樂文殊師利此法師住
如是法誦是呪術即於現世得十種力何等
爲十得念力不忘失故得慧力善擇法故得
行力隨經意故得堅固力行生死故得慚愧
力護彼我故得多聞力具足慧故得陀羅尼
力一切聞能持故得樂說辯力諸佛護念故
得深法力具五通故得無生忍力速得具足
薩婆若故文殊師利若法師能住是行誦持

呪術現世得是十力佛說是呪術力時四天
王驚怖毛豎與無量鬼神眷屬圍繞前詣佛
所頭面禮足白佛言世尊我是四天王得須
陀洹道順佛教者我等各當率諸親屬營從
人民衛護法師若善男子善女人護念法者
能持如是等經讀誦解說我等四天王常往
衛護是人所在之處若城邑聚落若空閑靜
處若在家若出家我等及眷屬常當隨侍供
給令心安隱無有厭倦亦使一切無能燒者
世尊又是經所在之處面五十里若天天子

若龍龍子若夜叉夜叉子若鳩槃荼鳩槃荼
子等不能得便爾時毗留勒迦護世天王即
說偈言

我所有眷屬 親戚及人民 皆當共衛護
供養是法師

傷十

爾時毗留婆叉天王即說偈言

十七

我是法王子 從法而化生 求菩提佛子

我皆當供給

爾時捷駄羅吒天王即說偈言

若有諸法師 能持如是經 我常當衛護

周徧於十方

爾時毗留婆叉天王即說偈言

是人發道心 所應受供養 一切諸衆生

無能辨之者

爾時毗留婆叉天王子名曰善寶持七寶蓋

奉上如來即說偈言

世尊我今當 受持如是經 亦爲他人說

我有如是心 世尊知我心 及先世所行

從初所發意 至誠求佛道 世尊無見頂

今奉此妙蓋 願我得如是 無見之頂相

我以愛敬心 瞻仰於世尊 願成清淨眼
得見彌勒佛 度智慧世尊 即時以偈答
汝於此命終 即生兜率天 從兜率下生
得見彌勒佛 二萬歲供養 爾乃行出家
既得出家已 淨修於梵行 賢劫中諸佛
一切悉得見 亦皆供養之 於彼修梵行
過六十億劫 汝當得成佛 號名為寶蓋
國土甚嚴淨 唯有菩薩僧 為講說妙法
壽命盡一劫 若滅度已後 正法住半劫
利益諸衆生

爾時釋提桓因與無數百千諸天圍繞白佛
言世尊我今亦當衛護能持如是之經諸法
師等供養供給是經所在之處若讀誦解說
我為聽受法故往詣其所又當增益法師氣
力法句次第令不漏失爾時釋提桓因子名
曰劬婆伽持真珠蓋七寶莊嚴奉上如來即
說偈言
我常現了知 世尊之所行 亦當如是行
求佛一切智 世尊於前世 無物不施與
我當隨此行 亦捨諸所有 我今法王前

受持如是經	當數為人說	以報如來恩
若愛念是經	是即與我同	我當供養之
為得菩提故	世尊聲聞人	不能守護法
於後恐怖世	我當護是經	世尊安慰我
又斷諸天疑	我今當久如	得佛如世尊
佛通達智慧	即時與授記	汝後當作佛
如我今無異	過去千萬劫	又復過百劫
爾乃得成佛	號曰為智王	
爾時娑婆世界主梵天王白佛言世尊我捨		
禪定樂往詣法師若善男子善女人能說是		

法者所以者何從如是等經出帝釋梵王諸	豪尊等世尊我當供養是諸善男子是諸善	女人應受一切世間天人阿修羅之所供養	爾時妙梵天子即說偈言
比丘比丘尼	諸清信士女	其能受此經	
是世供養處	乃至有一人	能行是經者	
我要當為人	演說如是經	敷眾妙華座	
高至于梵天	於此座上坐	演說如是經	
若於惡世中	所從聞此經	應發希有心	
踊躍稱善哉	若無量世界	大火悉充滿	

要當從中過 往聽如是經 能開佛道經
若欲得聞者 積寶如須彌 應盡供是人

囑累品第二十四

爾時世尊現神通力令魔波旬及其軍衆來
詣佛所作是言世尊我與眷屬今於佛前立
此誓願是經所流布處若說法者及聽法者
并彼國土不起魔事亦當擁護是經爾時世
尊放金色光照此世界告文殊師利言如來
今護念是經利益諸法師故是經在閻浮提
隨其歲數佛法不滅爾時會中衆生以一切

華一切香一切末香而散佛上作是言世尊
願使是經久住閻浮提廣宣流布於是佛告
阿難汝受持是經不阿難言唯然受持阿難
我今以是經囑累於汝受持讀誦爲人廣說
阿難白佛言世尊若人受持是經讀誦解說
得幾所功德佛告阿難隨是經所有文字章
句之數盡壽以一切樂具供養爾所諸佛及
僧若人乃至供養是經恭敬尊重讚歎其福
爲勝是人現世得十德之藏何等爲十見佛
藏得天眼故聽法藏得天耳故見僧藏得不

退轉菩薩僧故無盡財藏得寶手故色身藏具三十二相故眷屬藏得不可壞眷屬故所未聞法藏得陀羅尼故憶念藏得樂說辯故無所畏藏破壞一切外道論故福德藏利益衆生故智慧藏得一切佛法故佛說是經時

四十

二十

七十二那由他衆生得無生法忍無量衆生

發阿耨多羅三藐三菩提心無數衆生不受

諸法漏盡心得解脫爾時阿難即從座起偏

袒右肩頭面禮足白佛言世尊當何名此經

云何奉持佛告阿難此經名為攝一切法亦

名莊嚴諸佛法又名思益梵天所問又名文殊師利論議當奉持之佛說是經已文殊師利法王子及思益梵天等行菩薩長老摩訶迦葉慧命阿難及諸天衆一切世人受持佛語皆大歡喜

思益梵天所問經卷第四

音釋

劫燒

劫訖業切燒失也

魔隸

魔莫切隸郎計切

緹他

禮

切堙

於真切

麴

苦菊切

嵐

魯甘切

訖

丑嫁切